


DIBÀKÀ DYÀ

MWÂNÀ WA MUKÒÒKÒ

 Twasàkidil, Mwanèètù Edmonds. Mukalenge àkubènèshè. Ìbaamulòòlò mulenga, nwênù balundà bàànyì. Ncyà bushùwà ne ndyèsè kàbìdì dilòòlò edi bwà kwikala kaaba aka mu Fellowship Tabernacle. Pangápìcìdì mwab'ewu, mu mappingaja emu, mèmè e kumòna mwaba ùvwàyè, ki mèmè kumòna mwákù "Fellowship" wòwò kumbwelawu bilenga be. Ntu muswè aci, Mwanèètù Edmonds. Bwobùmwè, ke citùdì twitabuuja.

² Mulundà wanyì wa kale, udi mufùma ku diya kumbèlu bwà kwikala ne Mukalenge, bààbùngì bàà kunùdì mbafwànyìne kumumanya, Docteur F. F. Bosworth, bààbùngì bàà kunùdì. Ùvwa kaaba aka mu Phoenix emu, ngèèla meeji, pàmwè naanyì musangu kampànda, musùkà wà bukitù. Kàdì yèyè ùvwa mu... ùvwa ne—ne... Ùvwa muntu mununu wa cijila, kàdì ùvwa wèla minèkù. Ki kungambilayè, musangu kampànda, kwambayè... Mèmè mvwa mutùngunukè ne kwakula bwà bwobùmwè. Ki yèyè ne: "Mwanèètù Branham, udi mumanyè cìdì bwobùmwè buumvwija anyì?"

Mèmè ne: "Èè, ngèèla meeji ne ndi mumanya, Mwanèètù Bosworth."

³ Yèyè kwamba ne: "Mbantu bàbìdì mu bwátù bùmwè." Nàнку awu, ne aci cìdì ànu bu cyà bushùwà, bàbanyangana cibambalu ne mukwàbò.

⁴ Ne mvwa mumòne bààbùngì bàà kunùdì beelè byanza byènù muulu, bwà ne mbamanyè Mwanèètù Bosworth. Bu mùdìbì ne—ne nuvwa bamumanyè, ndi muswè bwà kwakula dìyì pa bikondo byèndè byà ndekeelu pa buloba. Mvwa mumumanyè bwà cikondo kampànda. Nènku ùvwa pambèlù apa ùyiisha Èvanjeelìyò ne ùsambidila babèèdì, kumpàlà kwà mèmè kulediibwa. Pa nàнку nudi mwà kumòna ne ùvwa bukolè kaayi. Mukalenge wàkamulama ne mwoyi, ngeela meeji, bidimu bitwè ku makumi mwandamukùlù ne bitaanù, cintu bu nàнку, ne muciiakàle ànu muntu wa bukitù pàkafwàye.

⁵ Pàvwàye ne bidimu makumi mwandamutekète ne bitaanu, ngèèla meeji ne mmwòmò, yèyè ne mèmè tuvwa ku... ngèèla meeji, ku Edgemont Hotel mu Miami. Nènku bamana kudya didya dyètù—dyètù dyà dilòòlò, twètù kupátuka kuya ku mwelelu wà mbu kùvwà mawaala àlwa, bwà kumòna mùvwà ngondo ùbànda. Nènku ncìvwa ne bidimu makumi ànaayi, makaaya ànyì makòbàme, ngènda ngènda mùshindù awu. Kàdì

yêyè, ne bidimu bitwè ku makumi mwandamutekète ne bitaanu, ànu mwolòlòke ne mwèndè mwònsò. Ki mèmè kumutàngila, ne mèmè kumukàcila. Ki mèmè ne: “Mwanèètù Bosworth, ndi muswè nkukonkèku lukonko.”

Yêyè ne: “Elààkù, Mwanèètù Branham.”

Ki mèmè kwamba ne: “Ndìbà kaayi dyúvwà mutàmbe kwikala bìmpè menemene?”

⁶ Yêyè ne: “Mpindyewu mene.” Ee, dìbà adi, mèmè kudyùmvwa bundù. Ki yêyè kwamba ne: “Udi upwà mwoyi ne ncìdi ànu mwànà mutekète, musòmbèle mu nzùbu mukulàkàje anyi,” mwàkambàye. Ne ki mùvwà m’Mwanèètù Bosworth nànkù.

⁷ Pangààkuumvwa ne ùvwà ùya katuutakeena ne Mukalenge, Ki mèmè kwamba kwòsha ndundu yà kàshinyi kànyì ne lubilu, mpweka mutàngile ku Miami, bwà kumumòna. Kàdi patwàkabwela ne mukàjàànyì ne mèmè... Nènku dìkù dyà Bosworth ne dìkù dyètù tùvwà balundà bàà dikèma. Ki twètù kubwela. Nkambwà mununu awu mulàle pa kalàalu kakesè. Ne ùkaavwa mujuukuluke, mutù wèndè mukesè wà dibala awu, ki kungolwelaye mabòko èndè makesè, manyaane awu, mùshindù *awu*. Binsònji bimpwekela pa matàma. Mèmè kumukwàta mu mabòko, ki mèmè kwela lubila ne: “Taatu wanyì, taatu wanyì, màkalù à mvità à Izalèèlà ne babàndi bàwù bàà pa tùbalù!” Bwalu, piikalàku kùvwà muntu mununu utu kacya mufile bunèeme mu nkwaka wa beena Mpenta, ùvwà m’Mwanèètù Bosworth. Ùvwà nyèyè menemene. Ùvwà cilòngò cinène.

⁸ Nenku nudi bamanye’s, cintu cyà kumpàla cidiye muswè kwenza, nkungeeshaku ndambù wa bilele, mùshindù awu, nudi bamanyè’s.

Ki mèmè ne: “Mwanèètù Bosworth, neùmvwè bìmpè anyi?”

⁹ Yêyè ne: “To, Mwanèètù Branham. Mèmè ncyèna nsaama to, twamb’eku twamb’eku.” Yêyè ne: “Nkàadi nya ànu Kwètù.”

Mèmè ne: “Èè, abi’s mbilenga be.”

¹⁰ Tucìvwà tufùminaku ku madimi à bwambi mu Àfrikè, yêyè ne mèmè. Yêyè kwamba ne: “Nkàadi mutàmbe kukulakaja bikolè ncìyi mwà kulààla kàbidì matùkù àbúngì to.” E kwambayè ne: “Ndi nya Kwètù.”

Mèmè kwamba ne: “Mwanèètù Bosworth, ncinyì cyùdi umbela bwà mèmè kwenza?”

¹¹ Ki yêyè ne: “Shàala ne Èvànjeeliyò.” Ki yêyè ne: “Alùkila ku madimi à bwambi ne lùkàsà lwònsò.” Yêyè ne: “Aci ke cidi cìfwànyine kwikala wànyì mubelu;”

¹² Ki mèmè kwamba ne: “Mwanèètù Bosworth, cikwàbò cintu cìmwèpele cìndi njinga kukukonka.”

Yêyè ne: “Ncinyì aci, Mwanèètù Branham?”

13 Mémè ne: “Mpindyewu, udi mufile bidimu bitwè ku makumi àsambòmbò kùdì Mukalenge, mu mudimu, anyi pàngápa bipite apu.” Ki mémè kwamba ne: “Ncikondo kaayi cìvwà citàmbe kwikala cyà disànka dyàbùngì menemene mu matùkù èbè à mwoyi?”

Yèyè ne: “Mpindyewu mene.”

Ki mémè ne: “Mwanèètù Bosworth, udi mumanyè ne udi ùpùnga ne lufù anyi?”

14 Yèyè ne: “Ncyéna mwà kufwà to. Mémè ngàkafwà kùkaadi bidimu byàbùngì.” Ki mémè. . . Yèyè ne: “Mwanèètù Branham, cyònsò cìntù munanga ne mucyùke mu bidimu makumi àsambòmbò bidì bipite ebi, Ndi mwindile bwà Yèyè kunkàngwila ciibi aci pa díbà kanà dyònsò bwà kulwabò, kungangata.”

Ndi ngèèla meeji ku *Musambu Wa Mwoyi* awu:

Nsòmbelu yà bantu banène bònsò yìdì
yìtùvulwija
Tudi mwà kuvwija nsòmbelu yètù mitùmbùke,
Mu kulayangana, tushìya paanyimà pèètù
Bidyacilu byà makàsà pa lusenga lwà cikondo.

Kàdì ncyà bushùwà ne mmushìye bidyacilu byà makàsà, bwànyì mémè.

15 Kumpàla kwà yèyè kufwà, anyi, ku-. . . kuya mu Butùmbi, bu díbà dijimà nànkù awu, anyi pàmwápa bipita apu, kumpàla kwà kuyayè dyàmwámwa, ukaavwa mwenze bu mulààle ndambù wa mèbà, mukàjèndè, bânà bèndè bàà balume, bananga bèndè biimàne bamunyèngùlùke, ke muntu mununu awu kutàbalayè, kukènzakanayè, kujuukayè kuulu, e kubangayè kutàmbakana panshì apu, e kulabulayè mamwendè ku cyanza mwinè awu ngukààvwa muyè kale bidimu byàbùngì, ne tatwèndè. Nènku munda mwà mutanci mupita díbà dijimà, ùvwa ùlabulangana ku byanza ne bantu, wàmba ne: “Ewu m’Mwanèètù John. Eyowà, wèwè wàkalwa kùdì Kilstò mu disangisha dyànyì dyà mu Joliet, mu Illinois. Ewu’s ke Mwanèètù. . .” Ùlabulangana ku byanza ne bèndè bàvwàye mukùdìmwishe mucìma bàkavwà baye dyàmwámwa, kùkaavwa bidimu byàbùngì.

16 Ndi—ndi nnwàmbila, míngà misangu ntu ngiitabuuja ne mu díbà ditùdì tuumuka pa buloba apa tukabwela mu bukwàbò, Ndi ngiitabuuja míngà misangu ne díbà. . . Musùlu nebiikale bikole bwà kuwúsabuka, twamb’eku twamb’eku, Nudi bamanyè’s. Ndi ngèèla meeji ne pàmwápa Mukalenge ùdì wàmbila bananga bèètù ne: “Pwekàâyì ku musùlu nukatuutàkèènè nendè kwìnshì kwàka.” Bwalu ànu mwàkambà Yakòbò ne, netùsangishiibwè pàmwè ne beena dyètù dīngà ditùkù.

17 Mémè pàànyì ndi mwindile bwà ditùkù adi kulwadì. Kàdì díbà adi pàngààjikija nsòmbelu wanyì wa pànwápa ewu, anyi

pààjikija Nzambi naanyi mudimu pànwàpa, nènku mmòna ne ngaakwàci lumbu lwònsò lùmvwà mwà kukwàta, mupicile mu tumici twònsò twà mēbà, ne mubànde pa kakùnà kwònsò, ndi muswè kutàngila paanyimà, kumòna mwaba ùmvwà, dībà dingàapweka ku musùlu.

¹⁸ Ntu ngàmba misaangu yònsò, bu bantu bàà bafike aba, batu ne kamusambu kakesè kàtùbò bìmba, “Ncyēna muswè kupeta lutàtu ku musùlu to.” Ndi muswè kwakaja maalu wònsò tàyàdi kuumukila ku mpindyewu.

¹⁹ Pàmwàpa kwaluja ànu mwelè mu cimàngà, ne kuvùla cifulu cyà mvità, ne kucitèeka panshi ku cisabù aku, ne kwela byanza byànyi muulu, ne kwela lubilà lukolè ne: “Pàtulà bwàtù bwà disungila, Taatù. Ndi ndwa kwètù mu dindà emu.” Yēye neikalèmu. Kùtácishi meeji to. Ndi ngiitabuuja nànkù. Ndi ngèela meeji ne ki dijinga dyà wònsò wà ku myoyi yètù adi.

²⁰ Mpindyewu, ncyà bushùwà ne ndyēsè dinène dyà kwikala kaaba aka dilòòlò edi ne mpaasàtà mulenga ewu ne èkèleeziyà wendè ewu, ne mudi wà nkèmenu ewu, ne aba bàdi basòmbele mu Kilistò, ku ndekeelu kwà Phoenix eku. Bwalu mu bushùwà bwà bwalu tudi biikadi. Tudi beenyi ne beena lwendu kaaba aka. Tudi twenda tukèba Cimenga.

²¹ Ànu bu mùmvwà ngàkula mu dindà emu mu tabernacle wa Mwanèètù Fuller, pa Dimiinu dyà Bukalenge. Mpindyewu, nwènù biikale ne bisanji bìdi bikwàta mikàbà yà méyi, ncitu mbùtèèja nànsha. Kàdi kuvwa cintu kampànda cyenzèke mu dindà emu, cìndì. . . Nwènù biikale ne cisànji cidì cikwàta mikàbà yà méyi, nwènù bapetè ùmwè wà ku mikàbà yà méyi, ndi mutwìshìbwe ne nenùwanyìshè. Mwanèètù Maguire ngudi naayi, ne *Dimiinu dyà Bukalenge dyà Abraham*.

²² Nwamònu’s, dimiinu dyà Abraham òwà Izàkà, udì mwena Yudà, mu mubidi emu. Kàdi Dimiinu dyà Bukalenge òwà Kilistò, ku mulayi, ne yēye Kilistò awu ùvwà Dìyì dyà Nzambi dimwènèshìbwe. Ne cidì mu mwoyi wètù leelù ewu patùdi. . . “Pùikalà mēmè. . . Nwènù bashààle munda mwànyi, ne Dìyì Dyànyi munda mwènù, dībà adi lòmbaayi cinùdi baswè, ne nebànwenzèlèci.”

²³ Mpindyewu, ngaakacyàmba, bwà Phoenix, misangu yàbùngì kacya ànu pàmvwà muneemu. . . Musangu wànyi wà kumpàla wà kulwa kùkaadi bidimu makumi àsàtù ne bitaanu. Lwà kwaka mu mùsèèsù wà 16 ne wà Henshaw, mùmvwà musòmbele, nkwaàcila mudimu mu Circle R Ranch muneemu, mu Wickenburg. Ki mēmè kuya ne kànà kàà bakàji kakesè mwàmwa mu mùsèèsù wà 16 ne wà Henshaw. Mvwa mukakèba mwaba awu ditùkù adi, ne kacicyèna kàbìdi Henshaw to. Cikaadi Buckeye mpindyewu. Ne ncimenga cinène mu citùpà cyà buloba cyà Phoenix emu. Bintu byònsò mbishintùlùke be.

24 Ki mukàjàànyì ne mèmè twètù kubànda ku South Mountain, bwà kwaluja meesù kutàngila Phoenix. Mèmè kudyàmbidila, kùkaadi bidimu nkàmà yisàtù, kakùvwa pàmwàpa cintu nànsha cìmwè mwab'ewu to pa kuumusha mibwàbwà, ntùlu, ne bikwàbò. Kàdi mpindewu ncimenga cyende luumù. Mpindyewu, mèmè kwamba ne: "Munanga wanyì, ncikùdimùne mucìma anyì ncitwè katungu? Udi mwà kudisungwila nkààyebè. Bwànyì mèmè, ncitwè katungu mpindyewu. Bwalu, nzùbu minène eyi ne bisàsà bilenga ebi bivwa bifwànyìne kwikala bimpè bu ne balùme ne bakàjì bàvwa bènda bàbànda bàpweka ne misèèsù, ne byanza byela muulu kùdì Nzambì, bàtùmbisha Nzambì, ne bàna bèètù bàà balùme ne bàna bèètù bàà bakàjì biikale ne nsòmbelu wa nànkù; pamutù pàà kunwà maalà, kutwa kaalàtà kàà mfranga, kunwà mfwankà, kushima, kwiba, tùnsànkì twà maalà, bintu byònsò byà bibì abi. Munkaci mwà byònsò abi, nànsha nànkù. . ."

Pashìishe mukàjàànyì kungambilayè ne: "Dìbà adi, Billy, cyùdì muvwile kaaba aka ncinyì?"

25 Mèmè kwamba ne: "Kàdi, munanga wanyì, kacya twasòmbà neebè mwab'ewu, tusunsa dikummi ne tùtaanu tujimà, mmashimi bùngì kaayi àdì malondìibwe mu cibandabanda mwàmwa? Mmicìpu bùngì kaayi yidìbo badicìpe, bateèla Dìna dyà Mukalenge citèèlàtèèlà? Mmfwankà bùngì kaayi, ng'wiski bùngì kaayi yidìbo banwè, mmasandi bùngì kaayi àdìbo bendè, ne mu byònsò abi amu, ànu mu cipòòlò cikesè cyà dībà emu, patùdì mwab'ewu apa?"

Ki yèyè ne: "Kì mbyà bikwàcisha bwòwà anyi?"

26 Kàdi mèmè kwamba ne: "Ki citùdì bavwilè muneemu eci, munanga wanyì. Mmasambila bùngì munyì à lulamatu àdì mabànde muulu kacya twafika muneemu? 'Nudi Bukènkè bwà bàà pa buloba.' Ki citùdì bavwile kaaba aka, bwà kutwàngana makaaya ne èkèleeziyà mikesè yà muneemu eyi, kwenza cyònsò citùdì mwà kenza, bwà kubàmbulwisha bwà kutungunuka. Bwà kwikala. . ."

27 Nwènù bwònsò, nwènù bansantu, nudi dibènesha kùndì. Ndi ntèkemena ne nèngìikalè dibènesha kunùdì, mu dinùkumbula dyà kaaba aka. Kàdi mèmè, pangààkajingulula ne ndi ne cyà kukùmbula màngumba ne malongolodi mashìilàngàne, ne—ne èkèleeziyà mishìilèshìilàngàne, ne bikwàbò, bàna bèètù bàà mu cibandabanda cyà Phoenix emu, mwoyi wànyì wùvwa ùtùpika ne disànka. Acì cìdì cìlwa kumpàlà kwà mpungilu wùndì ne cyà kwakulamù, ku mpungilu wa Beena Kilistò bàà Kantu-ku-byanza, Ndi ngèèla meeji ne, mu didyà dyà mu disambòmbò mu dindà, ne pashìishe mu masangisha à mu dyàlumingu mu mapingaja, bwà kulonda, dyàlumingu dyàlondà dyàdya. Nènku cìdì ànu dyèsè bwà kutuutakeena ne bàna bèètù abu. Ndi ngèèla meeji ne bàdì ne nkwasà yà kusòmba mitwè ku binunu bibìdì

ne nkàmà yìtaanu kuntwaku. Ayi mmyaba yàbùngì yà kusòmba bwètù twètù. Ne tudi tutèkemena bwà kutwilangana neenù kuntwaku.

²⁸ Nènku dībà adi bwà kwikala ne cikondo eci cyà bwobùmwè, bwà kuya ku èkèleeziyà ne ku èkèleeziyà, ne kwakula. Ndi ngèèla meeji ne ndi muyiishe mu dindà emu too ne mungaalu kupàcisha ne dīyì ku diyisha, munda mwà dībà dijimà ne citupà. Kàdi adi divwa dyà dīpì. Pa ciibidilu ncitu nguùmuka kumpàla kwà mēbà àsàtù anyì ànaayi à diyiisha to, ku—ku èkèleeziyà wa kwètù. Mémè ndi ànu . . .Ncyèna muyiishe to. Pa nàнку ndi—ndi ànu ngenza mutooyi wa disànkà bwà Mukalenge. Ndi muswè kuwènza bímpè menemene. Ndi—ndi ngèèla meeji ne ndi ànu mucinange, pa nàнку ndi ntùngunuka ne dicyènza. Mvwa . . .mbambè misaangu inaayi anyì itaanù ne ndi ndama bantu mpicisha too ne dībà, pa nàнку ndi mumanyè ne ncilelèlà. Nènku dilòlò edi, ne meeji wònsò matòòke, netùpatuke mwab'ewu kumpàla kwà dībà ùmwè. Mémè, ndi mufwànyine kunùshindikila cyòci aci. Ndi ànu, bu udi . . .Kùdi cyuyuyà cimpè be cyà nyumà, ne bintu byònsò mbilenga be, ndi mutwìshìibwe ne Nyumà Mwímpe neikale ne dinènèsha bwètù twètù.

²⁹ Mpindyewu, mpindyewu ncyèna mwenze midimu yà dyondopa mu masangisha to. Ndi . . .Dilòlò kampànda, kwà mwanèètù . . .mwena Dīnà dyà Yesù, mpaasàtà awu nganyì? Mwanèètù Outlaw. Èkèleeziyà wa Mwanèètù Outlaw, kùvwa bantu bààbùngì kuntwaku bàvwà bàjinga kubàsambidila. Nènku kukèngelabi bwà ne mwanàanyi wa balùme àfilè twarta twà disambila. Ne pashiishe ndambù wa malòlò, Nyumà Mwímpè mwikàle ùmata mu citanda amu, too ne . . .Nwènù bònsò nudi bamanyè's. Nukaavwaku mu masangisha àanyi. Nwènù bònsò nukaavwamù. Nudi numòna mùdi dijingulula, ne bikwàbò. Kàdi mpindyewu ndi mumòne ne bàà kusambidila bàdi bènda bàtentamangana. Kàbìdi mvwa mumòne ne cyà kumpàla, pa kubangila mu dīsàatù ne mu dīnàayi. Mémè kudyàmbidila ne ndi mufwànyine kwindila too ne paanyimà pàà dyàlumingu, bwalu pawikalà ne masangisha à dyondopa mu èkèleeziyà . . .

³⁰ Nudi numòna's, ndi—ndi mumanyishe myaba yònsò yīndi muyè bwà muntu yònsò àshaalè pa kaaba kèèbè kàà mudimu mu dyàlumingu, nudi numòna's. Masangisha à pa bwàwù aa adi ànu bwà kukùmbulangana ne bānà bèètù. Nènku tudi—tudi baswè bwà muntu yònsò àlamè kaaba kèndè kàà mudimu, bwalu mpaasàtà webè mmukwindile, nènku ke mwaba ùvwà ne cyà kwikala.

³¹ Nàнку dībà adi—dībà adi ndi ngèèla meeji ne, mààlabà dilòlò, bu Mukalenge mwà kwanyisha, ncyèna . . .Mpenyì patùdi ne cyà kwikala mààlabà dilòlò? [Mwanèètù kampànda ùdi wamba ne: “Mwàmwa mu Tempe, ku èkèleeziya wa

Mwanèètù O'Donnell.”—Muf.] Mwanèètù O'Donnell, ku Tempe, mu Arizona. Mpindyewu, nwènù kanùyì ne ci—cintu kampànda cyà pabwàcì cìdì munkacì mwà kwenzeka mu èkèleziyà wenù, kàdì bìikàle ne babèèdi, mònà's, nènsambidilè babèèdi, mààlabà dilòòlò, ànu ne mulongo wa babèèdi wa ciibidilu, nsambidila babèèdi, pàmwápa—pàmwápa mu òmòwè, mu diibìdì. Tùmonààyibì, ndi ne cyà . . . Ndi . . . Kaa, ndi ne . . . Ndi ne masangisha bwà mu diisátù dilòòlò kàbìdì anyì? [“Èyowà.”] Mu diisátù dilòòlò. Dìbà adi cìdì . . .

³² Nènku ùdi ùbanga mu dinààyi, mmwómò anyì, mwinè mpungilu awu? [Mwanèètù kampànda ùdi wàmba ne: “Ndi ànu bu udi ne bintu . . . ? . . .”—Muf.] Èyo, mwanèètù. Yèyè neàfilè dimanyisha mpindyewu. [“Nwamònu's, tudi kaaba aka dilòòlò edi. Nènku mààlabà dilòòlò tudi ku Assemblée de Dieu wa ku Tempe. Pashiishe ku Mountain View mu Sunnyslope mu dyà matùkù makumi àbìdì ne àsátù. Ne pashiishe mu Assemblée Centrale mu dyà matùkù makumi àbìdì ne ànaayi.”] Èyo, abi mbìmpè. [“Ncìvwa mwà kuvùluka to, mèmè mwinè. Mvwa mwenzè bu mubìbwejàkàje.”] Kacikutàcishi mu meeji to.

Mvwa ngàakula ditùkù adi, bwà bwalu abu ne: “Ncìvwa mwà kuvùluka to.”

³³ Ki Mwanèètù Jack Moore kungambilyè, wàmba ne: “Udi wela meeji ne udi mubì anyì?” mwàkambàye.

³⁴ Mèmè kwamba ne: “Mwanèètù Jack, ndi mbanga kuyiikila, ncìciyi mwà kuvùluka ciine cìmvwà ngàmba aci to.”

³⁵ Yèyè ne: “Kwèdikù meeji ne aci ncibì to.” Kwambaye ne: “Ndi mbiikila ku téléfònè, mbiikila muntu kampànda, ngàmba ne: ‘Cyùvwà naaci dijinga ncinyi?’” Ee, aci's cyabiipi be! . . . ? . . . Kaa!

³⁶ Nànku, ekèlekèle, aci ncifwànyine kumvwika cyà bilèlè, cìdì ncìyi ngèla meeji ne mbìmpè bwà kwamba ku cyambilu eku to. Kàdì bânà bàà Nzambì bàdì ànu bânà bàà disànka, nànsha munyi, nudi bamanyè's, pa nànku tudi,—tudi ànu baswè. Mvwa ngèèla meeji ne aku kaabwalu kàvwakù kìmpe.

³⁷ Nwènù bònsò, bààbùngì bèènù, nudi bamanyè Mwanèètù Jack Moore. Yèyè ngwa ku Shreveport, mu Louisiane, Life Tabernacle, mwanèètù mulenga be. Nènku ke mùvwàye ùngambila nànku. Yèyè pèndè, mmwibaki.

³⁸ Kwambayè ne: “Kwèdikù meeji ne aci ncibì to, Mwanèètù Branham.” Yèyè ne: “Ndi mubiikile muntu kampànda ditùkù adi, nènku kubiikila nombà wendè.” Ki yèyè ne: “Awu kwandamuna, wàmba ne: ‘Wetwàwù.’ Mèmè ne: ‘Èè, cyùdì muswè ncinyi?’”

Mèmè kudyàmbidila ne: “Èè, abi's byàkolù, Mwanèètù Jack.”

39 Nànkù mpindyewu, ngèèla meeji ne mbifwànyine kwikala bîmpè, ne balunda aba bàdii baswè bwà kubàsambidilabò aba, ne kubweja babèdi bàbò, dîbà adi netùbàsambidilè.

40 Mpindyewu, dilòòlò edi, mvwa ngèèlangana meeji pa cîmvwà mwà kwamba dilòòlò edi mwab'ewu mu kaèkèleeziyà kakesè kîmpè aka. Mémè kudyambidila ne: “Èè, ncyèna mumanyè ne ncinyi to.” Ndi ànu ne cyà kwangata kaa cyena bwalu kakesè, mwikàle ngèyemena ne Mukalenge neàsambakajè méyi mwaba kampànda, nekuàlekela àmacila mwaba wikalàwu mwà kwambulwisha muntu kampànda awu. Bwà kwikala... Ncitu nteeta kwangata cyena bwalu kampànda nànsha, ntu misangu yònsò ànu nteeta bwà kudyùmvwa mulombòdiiibwe, ne kufùnda ndambù wa Mifùndu, ne bikwàbò. Ne—ne pashiishe, bu Mukalenge mwà kulombola bishiilàngàne, dîbà adi ndi nya ànu mùdìYe ùlombola amu. Nènku ndi ngèèla meeji ne ke mùshindù ùtùvwà bònsò ne cyà kwikala twenza. Kî mmwòmò ànyì? Kwenza mùshindù wà mwomùmwe awu.

41 Kàdi mpindyewu kùdi cintu cîmwè cîndi—cîndi—cîndi muswè, bwà yònsò wa ku èkèleeziyà kucimanyisha cyòci eci kùdi mubidi wònsò wà pa kaaba. Ne cyòci ncyà ne, ne piikala... Panwàjikija kusambidila mpaasàtà wenù ne bananga bèènu, kanwikadi nwàmpwà mwoyi, bwalu ndi ngùmvwa ne, ku ditùkù ne ku ditùkù, kupita mùvwàbi kwònsò eku, tudi twenda tupweka batàngile ku ndekeelu kwà njila.

42 Ngafùmu ku dijiika dyà maamù wanyì, kùkaadi ndambù wa mbingu. Ne kushààla kacya ngamukwàta mu mabòkò ànyì too ne mwàkangatà Nzambi mweyelu wèndè ne musùukà wèndè mu Dyulu. Ngaakashààla mutàngile lufù lwà bukitù lwà mukàji mùle tètè ne Nyumà Mwîmpè, ne kumumòna ùfika too ne ku ndekeelu wa njila. Mémè kudyambidila ne: “Kaa, ndi—ndi ànu ne cyà kwenza ne maamù yònsò iikale mùshindù awu. Ndi ànu ne cyà kwenza cintu kampànda bwà kufikisha... kwenza cîndi mwà kwenza, bwà kufikisha bantu ku dimòna bulelèlè menemene cidici cyùmvwija.”

43 Nènku, balunda bàànyì, ndi mutwishiiibwe ne mînga misangu cidi ne ndòndò mutambidile ndambù. Kàbidi ndi ngèèla meeji ne tudi tucyàngata ne mapeepelela àbúngi kutàmba mùdici bulelèlè menemene. Ndi ngèèla meeji ne tudi ne cyà kuvùluka. Piikalàbi ne Nzambi ngwa cijila mu mùshindù wa ne Banjèlò bàdi bàmwèka ne manyanù ku mèsù Kwèndè, tudi tumwèka bishi twètù? Nwamònu anyì? Ncyà bushùwà. Pa nànkù butùdi naabu mbwà kuvùluka. Nènku vùlukàayi, Nzambi mmusòmbe kule mu Cyendèlèlè, cidi citamba kwela nsèsà kupita mèbà wònsò mu bukwà mabulunga. “Wa cijila, wa cijila, wa cijila,” Banjèlò ne mapwàpwà mabwikile kwìsù, ne pamutù pàà makàsà àbò, bàbùuka mu Bwikadi Bwèndè, bèèla mbilà ne: “Wa cijila.” Bivwa bikèngela bwà twètù kwikala cinyì? Pa nànkù twètù... Ke citùdi tuteeta kwenza ncyòci aci.

44 Ne—ne ndi ndyùmva mùshindù ewu, Bukalenge bwà Nzambi, mbufwànàngàne ne muntu uvwa mwangate bukòndò ne muyè ku mbù, mwàkambà Yesù, ne wàkeela bukòndò mu mbù. Kàdi pàakabùkòkàye, wàkawkàta byà mìshindù yònsò. Kàdi mushipa mwìmpè, mu bushùwà bwà bwalu, wàkalamiibwa; kàdi bidyàbibile bikwàbò ebi byàkaalujiibwa mu màyi, bu mùdi nshishà, ne—ne nyòka, mìsodyà, ne nkùvu yà mu musùlù, ne bikwàbò. Kàdi bukòndò bwà Èvànjelìyò budi bùkwàta byònsò. Nènku tudi. . .Nekwikale dìngà ditùkù dìikalà cikondo citwèla bukòndò bwètù bwà ndekeelu, Mwanèètù Adams. Ncyà bushùwà. Ki nnwènù anyi mèmè bàdi mwà kwamba udi mushipa ne udi kàyì mushipa to. Twètù katwèna bamanyè to. Twètù tudi twela ànu bukòndò ne tubùkòka. Kwàjiki. Nzambi mmumanyè Bèndè. “Aba bàkadyànjlàye kumanya, Wàkabàbìkila; ne aba bàkabìkìlàYe, mmubàbingìshe; ne aba bàdiYe mubingìshe, mMubàtùmbìshe.” Pa nànkù tudi bindìle, munkaci mwà kwela ànu bukòndò cyanààna. Nànkù ndyèsè kùndì dilòlò edi bwà kwimana mu èkèleeziyà wa Mwanèètù Edmonds emu bwà kumwambulwisha bwà kwela bukòndò kaaba aka, bwà kumòna ne kùdi mushipa kàmpànda ùdi naawù Nzambi bwà Bukalenge Bwèndè.

45 Mpindyewu, ànu kumpàla mene kwà twètù kubala Dìyi, twanjaayi kwakula ne Mwena Dìyi kakesè cyanààna patùdi twinyika mitù yètù apa.

46 Ne mitù yètù miinyika, mu bunsantu bwà katanci aka, katùdi tusemena ku Dìyi dyà Nzambi udi ne mwoyi, didì Nzambi edi, ndi ndikonka ní kùdikù bantu kaaba aka bàdi ne malòmba mu myoyi yàbò, bàdi baswè bwà kubàvùlukabò mu disambila edi. Amanyishàayi ku cyanza cyela muulu.

Mukalenge Yesù, tàngilàaku batèeleji, mùdi mumanyè mwoyi wònsò.

Twasàkidila.

47 Nzambi mutàmbe kwikala wa ngàsà ne wa cijila, wa Bukolè bwònsò, El-Shaddai, wàkamwènekela Abraham mu Dìna dyà “Wa Bukolè bwònsò, Nzambi wa mabèèlè, Mufidi wa bukolè, Mudiishi wa batekète,” Iwàkù kutùdi dilòlò edi, Taatù. Ne tudi bamanyè matekète ètù ne bilèmà byètù. Tudi tutonda mpèkaatù yètù kumpàla Kwèbè, ne tuyitèeka pa cyoshelu Cyèbè cyà cyamù cyà mitàku cyà cilumbulwidi, ne tulòmba bwà Mashì à Yesù Kìlistò kuyùmushawù, mu mulàmbù utùdi tufila. Enzàku nànkù, Èyi Nzambi.

48 Tudi tulàmbula nsòmbelu yètù ne byònsò bitùdi naabi, ne kadimanya kakesè kàdi katùpèèsha. Mukalenge, kwàtaaku naakù mudimu bwà butùmbì bwà Nzambi.

49 Bènèshàku èkèleeziyà ewu, mpaasàta wendè mulenga, balami, balubuludi, ne kasùmbù kàà balombodi kwònsò, ne cidimba cyònsò cidì cibwelà mu èkèleeziyà ewu mubiikidiibwe

ne “Fellowship.” Nzambi, ndi ndòmba bwà balùme ne bakàji, pàdibo bàbwela mu ciibi cyà mwaba ewu apa, bwà kukùlukabò mu ditwìshiihwa bwà bulongàme bulenga bwà Nyumà Mwîmpè bùdi munda mwà nzùbu emu. Enzàku nàнку, Mukalenge.

⁵⁰ Tùfwilèku luse ku mpèkaatù yètù, ne matomboka ètù, tudi tulòmba cyàkàbidì. Vùlukààku aba bàdi beelè byanza byàbò muulu. Mwinshì mwà cyanza aci, Mukalenge, mùvwa mwoyi ùlòmba cintu kampànda cyà kùdi Wèwè, ne pàmwàpa mingà misangu ànu Wèwè ki wudi mwà kucifila. Ndi ndòmba bwà Wacyènzàku, Taatù. Cyònsò cidìbo naaci dikèngela, bàpèeshèci cibòdyòdyòke. Kwòkò babèèdi, Mukalenge, bwondòpèku. Kwòkò kwikàle ewu udi udìshìnda ku luseke lwà njila, mukoleshe yèyè awu, cinù cidì citekète aci. “Dilèngè dicibula, Yèyè kàkudikosa to, nànsha mukùsù ùdi ùfwima mwìshì Yèyè kàkuwùjima to.” Ne tudi bamanyè ne Yèyè kàdyàkudyombola dilèngè dicibula to; mMufwànyìne kudìlongolola. Ndi ndòmba, Taatù wa mu Dyulu, kwòkò kwikàle nyumà idi micìbùlùke anyì—anyì mitekèshiihwe mu mabòko, anyì byanza bitekète bilembèlele, ne mpòmbombò yà binù yituutakana, swàku bàbandishiihwe dilòlò edi, Mukalenge. Swàkù bwà Nyumà Mwîmpè àlwe ne wondòpàku myoyi yètù ne nyumà yètù, ne bumùntù bwètù bwà mubidì, nènku netùMupèshè luumù lwònsò bwà bwalu ebu. Tudi tucìlòmba mu Dìnà dyà Yesù. Amen.

⁵¹ Bu nwènù mwà kuswà kubuulula mu Mifùndu, ànu bwà muyiiki wà tusunsa tutwè ku makumi àsàtù cyanààna, Ndi muswè bwà nwènù kubala pàmwè naanyì mu mukàndà wà Bwàkabuulwibwà, nshapità wa 19. Nènku ndi muswè kubala kupweka too ne ku mvensà wa 7, mubadilakù.

Nènku panyimà pà malu aa ngakuummvwa dīyì dikolè dyà bantu bàbùngi mu dyulu, bàmba ne: Alleluuyah; Lupàndù, . . . butùmbi, ne luumù, ne bukolè, kùdi Mukalenge Nzambi wetù:

Bwalu kulumbulwisha kwèndè nkwa lulamatu ne kwakàne: bwalu wàlumbùlwishì mukàji munène wa masandi awu, uvwa munyangè buloba ne masandi èndè, ne musombwèlè mashi à basadidi bèndè ku cyanza cyèndè.

Ki kwambabò kàbidì ne, Alleluuyah. Ne mwìshì wèndè e kubàndawù bwà kashidi ne kashidi.

Ne bakùlù makùmi àbidì ne bànaayi ne nyama yinaayi yàkapòna panshi ne kukuukwila Nzambi uvwa musòmbè pa nkwasà wa butùmbi awu, Bàmba ne: Amen; Àlèluuyàh.

Ki dīyì kupàtuka mu nkwasà wa butùmbi, dyàmba ne: Tùmbishàayi Nzambi wetù, nwènù basadidi bèndè bònsò, ne nwènù bàdi bàmuçiina, bònsò ne bakesè ne banène.

Ne ngàakuumvwa byênze bu mutooyi wà musùmbà munène, ne byênze bu mutooyi wà màyi manène, ne byênze bu mutooyi wà mikungulu mikolè, wamba ne: Alèluuyàh: bwalu Mukalenge Nzambi wa bukolè bwónsò ngudi ukòòkesha.

Twikalaayi ne musàngeelu ne túsankàayi, ne tûfilàayi luumu kùdiye: bwalu dibàkà dyà mwànà wa mukòòkò dyàkulwa, ne mukàjèndè musèla mmumanè kudilongolola.

⁵² Ndi muswè kwakula dilòlò edi pa cyena-bwalu cyà ne: *Dibàkà Dyà Mwànà wa Mukòòkò*, ànu bwà katanci kakesè cyanààna bwà...Tudi batàmbe kwibidilangana bikolè ne Mufundu ewu. Kakùyì mpatà to mpaasàtà wenù munanga ewu ùkaadi mulengèlèngè cyena bwalu eci misangu yàbùngì.

⁵³ Nènku, aci, tudi bamanyè ne nekwikalè Mukàji-musèla, ne nekwikalè didyà dyà dibanji dyàfidiibwa mu maulu. Aci neciikaleku cyà bushùwà, ànu mùdì Nzambi emu, bwalu n’Dìyi Dyèndè. Nènku tudi bamanyè ne aba bìikalà mwà kwenza Mukàji-musèla awu nebiikalè Èkèleeziyà Wendè, ne bóbò nebàmwenekè kumpàla Kwèndè kabàyi katoba anyi mufudì nànsha. Ne bàdi ne byamù byà kudilongolola naabi pa buloba patùdì twakulangana apa. Nwènu mwà kumòna, Mbàmbe ne: “Yèyè mmumanè kudilongolola.”

⁵⁴ Bààbùngì menemene bàtu bàmba ne: “Bu Nzambi mwà kumpàtulakù nyumà mubi udi munda mwànyi ewu, kunguumusha ku dinwà dyà maalà, anyi ku ditwà dyà karta kàà mfranga, kunguumusha ku dishima, anyi ku bwìvi, nemMusadilè.”

⁵⁵ Kàdi bwalu mbulàalè kùdi. Nwamònu’s, wèwè udi ne cyà kwenza cintu kampànda, wèwè pèèbè. “Aba bààcimunà nebàpyanè bintu byònsò.” Aba bàcimunà. Wèwè udi ne bukolè bwà kucyènza, kàdi bùdì naabù mbwà kwikala ne diswa dyà kucishimbula. Nwamònu anyi? “Yèyè mmudilongòlòle.” Mémè ntu munangè Dìyi adi.

⁵⁶ Nudi numòna’s, Nzambi kàvwa mwà kutùsàkila mu kalubungu kakesè, ne kutùpàtwila elu lusekè, kàdi kwamba dībà adi ne: “Wa dyàkalenga ng’ewu wacimuna nànsha.” Kùvwa ne cintu nànsha cìmwè cyà kucimuna to; Yèyè mmukupuuse mukupicishilemù cyanààna. Kàdi bivwa bikèngela wèwè kwangata mapàngàdika bwèbè wèwè mwìnè. Mémè ndi ne cyà kwangata mapàngàdika bwànyi mémè nkààyaanyi. Mu kwenza kwà nànkù, tudi tuleeja diitabuuja dyètù ne kaneemu kùdi Nzambi.

⁵⁷ Abraham bàvwa bamulaye mwànà, kàdi ùvwa ne cyà kushàala mulame mulayi munda mwà bidimu makumi àbìdì ne bitaanu, mabika ne mala àkapticilayè, ne matèyi, munda mwà

byòbì bidimu makumi àbìdì ne bitaanu abi. Kàdi wàkawkàta ku díyì dyà mulayi.

⁵⁸ Ne Izalèlèlà bàvwa bamulayè buloba bulaya, kàdi bàvwa ne cyà kulwangana bwà katùpà ne katùpà kàà buloba abu. “Mwaba wònsò wàdyatà mwinshì mwènù mwà makàsà, ndi munùpèeshewù,” ki mùvwà Nzambì mwambile Yoshùwà. Byònsò bivwa mwaba awu. Buloba bùvwakù, ne Nzambì ùvwa mubàpebù, kàdi bàvwa ne cyà kubùlwangeena.

⁵⁹ Mùshindù ùmwèùmwe awu ke ùdìbì bwà dyondopa dyà kùdì Nzambì. Nzambì ùdì ne bukolè bwà kukwondopa, pawikalà ne bukolè bwà kuciitaba, kàdi newùlwanganè bwà katùpà ne katùpà kwònsò kàà njila.

⁶⁰ Nzambì ùdì ne ngàsà udi ukèmeshà bwà kukusùngila, ne Yèyè neàcyenze, kàdi newùlwanganè bwà katùpà ne katùpà kwònsò kàà njila webè.

⁶¹ Ndi paanyimà pàà cyambilu, kùkaadi bidimu makumi àsàtù ne cimwè, ne katùpà ne katùpà kwònsò kààbì kàvwa ànu mvità, yà kashèndèdè. Ncyà bushùwà ke mùvwàbì menemene.

⁶² “Kàdi tudi ne cyà kulwangana mvità twètù ne cyà kukòokeshà.” Pa nàнку tudi tujandula ne Mukàjì-musèla ùdì ne cyà kuDìlongolola. “Bàdìswìle bwà kutèeka ku lusekè bujitu bwònsò bùdì butùjingile bipepele, bwà twamòna bwà kunyema ne lutùlù lubilu lùdì lutèkibwe kumpàlà kwètù.” Tudi ne cya kubùtèeka ku luseke, twètù biine. Katwèna mwà kwamba ne: “Nzambì, Lwàku, ùtùtèekelewu ku luseke to.” Twètù mbàdì ne cyà kucyènza, twètù nkààyetù.

⁶³ Mpindyewu, ndi muswè kwelangana meeji pa didyà dyà dibanjì. Mvwa mupetè dyèsè dyà kuswika mabàkà à bantu ndambù. Kàdi ndi ndyàmbidila, dìbà dìndì ngiya ne nsongàalùme ne nsongàakàjì ku cyoshelu, ne kubàmòna bènda balwila mu èkèleeziyà; ne yèyè nsongàkàjì, mulengèle ne bivwàlù byèndè byà didyà dyà dibanji pambidi, ne cibwikilu kwìsù kàbìdì cilembèlèlè; ne mubàki, musulàme, muvwàle bilengèle; kàbìdì wa citende mupàte bu kambelè, pàdìbo bènda bàpwèka bònsò ne makàndà tumatuma, ne bènda malaya à dibàkà awu, ngèèla meeji ne kùdì cintu kampànda cyà kalolo pa bwalu abu. Kùdì cintu kampànda cyà cijila, bwalu aci cidì cimvùlwija ne nekwìkale dikwàbò didyà dyà dibanji dīngà ditùkù, dībà dyàlwà Mukàjì-musèla wa Kìlistò wènda wèndela mu tujila twà mu Butùmbi.

⁶⁴ Mubàki neikale mumanè kulongolola bintu byònsò. Nekwìkale didyà dyà dibanjì ne didyà dyà dilòòlò. Mùshindù mwìnè ùtùdì banange kwelangana meeji pa kusòmba kwà ku mèèsà batàngìlàngane muntu ne mukwèndè, ne tulabulanga ku cyanza ewu ne mukwèndè, ne binsònji bitùpwekela pa matàma. Anji elààyiibi meeji tūng, Yèyè neàseemenè, kutùkùpula binsònji ku mèsù, wàmba ne: “Lekèlaayi mwadi. Kwàjiki mpindyewu.

Bwelàayi mu masànkà à Mukalenge àvwà manùlongolwela kacya ku cibangidilu cyà difùka dyà dyulu ne buloba.” Kaa, mwanèètù, aci’s necyènzè ne tùnanganane ewu ne mukwèndè bikolè.

⁶⁵ Ngèèla meeji ne ki lutàtù lùdì naalu Èkèleeziyà ndwòlò alu, Mukàji-musèla leelù ewu, udi mwenza kùdì maèkèleeziyà wònsò àdì itabuujà Kilistò. Ki nzùbu wa èkèleeziyà to, kacyéna nànsha bulongolodì anyì dīngumba nànsha, kàdì mbantu-nkààyà bàdì mu èkèleeziyà bàdì bènza Mukàji-musèla.

⁶⁶ Ndi ne mulunda wanyì mwímpè mu Louisville, mu Kentucky, Docteur Wallace Cauble, uvwa mwambi wa mu Église de Christ, kàdì wàkalwa e kupetayè Nyumà Mwímpè, ne ùdì ùdiisha umwe wa ku èkèleeziyà minène, mitàmbe bunène mu Louisville, èkèleeziyà wa Ciibi Cyunzulula. Úvwa mulunda wa mushinga mukolè menemene kùndì. Nènku kùkaadi ndambù wa matùkù, mvwa mwimane mu mùsèèsù, ki mèmè kumòna upweka ne mùsèèsù. Nènku ntu mumunange kwònsò eku, ne yèyè ùvwa munnange.

⁶⁷ Kàdì dīngà ditùkù bàvwa bamupandè kamina bidyà, ne mashi àvwa àmupàtuka byà lufù. Ne bàvwa bayè nènde kuntu kwàka ku Lùpitaadi lwà Saint Joseph, ne bàvwa bàmba ne cyèndè ndufù. Ki Mādamù McSpadden e kumbiikilaayè wamba ne: “Docteur Wallace Cauble.” Ncivwa mwanji kumumanya to, kàdì mvwa mumanyè ne kuvwa èkèleeziyà munène wa Ciibi Cyunzulula. Kwambayè ne: “Údì ùpunga ne lufù. Bangàngàbukà mbamutwè nshingì, ne bikwàbò byònsò. Mbamwàsè tukànu. Mashi àdì ànu àmutùnkumuka, kàdì kakwèna mùshindù wà bóbò kwimanyika mashi nànsha kakesè. Mashi èndè kaèna adyènza mabùlu to, kàdì, nudi bamanyè’s, bwà kwimanyika dizòna.” Ki yèyè kwamba ne: “Bàvwa ne bāmpāndānjilā muntwamu, ne mbaswè bwà wèwè kulwa, kumusambidila.”

⁶⁸ Èè, nkàvwa mùmvwe bààkula bwà Docteur Wallace Cauble, ne nānku mēmè e kudyūmvwa mwoyi munneema ndambu, kàdì mēmè e kuyakù. Kàdì pangāàkatāngilā mu cibambalu cyà lùpitaadi amu, mùvwa bāmpāndānjilā, ne bambi banène, bōnsò muntwamu, bèla mbilā bàsambila. Ki mēmè kudyāmbidila ne: “Kaa, ekèlekèle! Ka mēmè aka, kansantu kakesè kabūnguluki kàà mu malaba aka, nkabwelè muntu amu anyi? Bivwa bīmpè nànsha mēmè kushāādila pambèlù apa’s.” Pa nānku ke mēmè kupweka kumfundu kwà Cyamù cyà Koka pambèlù apu mu cibweledi. Mēmè kulòmba Nzambi, bwà—bwà kwimanyika mashi, bwà Mwanèètù Cauble. Mēmè kutùluka e kupàtuka.

⁶⁹ Ki mēmè e kufika kumbèlu, tusunsa tutwè bu ku dikumi ne tūtaanu, ki téléfonè kudilayè kàbìdì, ne bajinga kumanya cīvwa cinjāngūlūje, bàmba ne ncivwa kuntwaku to. Ki mēmè ne: “Ndi—ndi mulwè. Kàdì kùvwa bantu bàābūngì muntwamu. Mēmè—mēmè mvwa mudyūmvwe ncìyì mulombòdìibwe bwà kubwela

to, pàngāpa, nwamònu's, bantu bààbûngi menemene, bambi banène bāvwa muntwamu.”

⁷⁰ Pashiishe kwambayè ne: “Lwâkù mpindyewu mene.” Yêyè ne: “Muntu ewu kêna mwà kwikala ne mwoyi to ànu katanci kakesè cyanààna.”

⁷¹ Ki mêmè kwalukila, cyàkàbìdì. Kàdi pangàkabwela muntwamu, yeyè ùteeta bwà kufikisha mànselà wa beena Kàtòlikè ku ditabayè Kilisto bu Musùngidi wa sungasunga; piinè apu's mmashi àmuzòlòloka, ne miinè mashi awu àmusòmpòka mukana. Ke mêmè e kubwela.

Ki yêyè ne: “Lengèjaaku túng?”

⁷² Ki mêmè kwamba ne: “Ànu wêwè?” Ûvwa musòmbèle mu bulàlù, mwikàle ùkòsola mùshindù awu, ne mashi miikàle àpàtuka.

Ki yêyè ne: “Dìna dyèbè nganyi?”

Ki mêmè ne: “Mêmè ndi Mwanèètù Branham.”

⁷³ Ke kukùtulayè mwadi, kunjìngilayè mabòkò èndè. Mêmè e kutwà binù panshi mwab'awu.

⁷⁴ Mpindyewu, n'Docteur Wallace Cauble, wa mu èkèleeziyà wa Ciibi Cyunzulula mu Louisville. Mufùndilaayi mukàndà. “Ànu pa kapwishipwishi aku mashi ùmba akàma.” Kaàtu manji kupàtuka nànsha, ànu piinè apu. Nwamònu anyi? Ki twètù kushààla balunda balenga batàmbe kwambwila ànu piinè apu. Ki ditùkù adi, mêmè kutwilangana nendè. Ki kwambayè . . .

⁷⁵ Oswald J. Smith, bààbûngi bàà kunùdì mbamanyè Mwanèètù Smith. Yêyè mmpàndànjlà munène, ne ùtu ùlwa kwà Mwanèètù Cauble, bwalu mmumuswè bikolè be. Yêyè ne: “Mwanèètù Cauble, udi mumanyè's,” yêyè ne: “Mêmè . . .” Cintu kampànda pa bìdì bitàngila mukàjèndè. Kwambayè ne: “Pangààkasèlanganà dyàmbedi,” wamba ne: “Mvwa ndyùmve ne, èè, mêmè mwenzè cilèma, nèngìkale, kaa, ndi mwà kupeta mukwàbò,” bwalu ùvwa nsongààlùme. “Kàdi,” mwàkambàye, “paanyimà pàà bàna bamanè kulwa,” mwàkambàye, “pashiishe kulwabi bikolè bwà kwenza cintu yêyè kàyikù nànsha. Dìbà adi's mpaùdì ukùmbàja bidimu bitwè ku makumi àtaanù, kwèna ànu mwà kwenza cintu yêyè kàyikù nànsha. Ne paùdì wenda ukola apu, mòna's, udi—udi udyùmve wà mùshindù awu.”

Mêmè kwamba ne: “Ngèèla meeji ne aci ncyà bushùwà.” Mvwa . . .

⁷⁶ Bwalu bwinè bùvwa bujuukile pa, s'nudi bamanyè mùtù ba inàbànza mwà kusakula amu, ne mukàjàànyì ùvwa muntwamu. Yêyè's ki mukalenge mukàji wa biine abi. Yêyè ùdì ùshààla dîbà dyònsò. Makàsà atu anshìikila, mu mùsèèsù amu patùdì twenda tunyùnguluka nendè. Nènku ùvwa munkacì mwà kungambila, wamba ne: “Ee, kwèna mwà kwenza cintu kùyì nendè nànsha.” Nènku ki mwàlu bwalu abu kwambiibwa.

77 Pangàkaalukila ku nzùbu, mvwa musòmbe mu cibambalu amu, ngeelangana meeji ne: “Aci’s ncyà bushùwà.” Ki mémè kuciteeka ku cinga cintu kàbidì.

78 Nudi bamanyè’s, pàncìvwà nkùdimwinakù mucimà mu... mulwè muyiishi wa ba-Baptistes Missionaires, mémè kudyàmbidila ne: “Muntu yèyè kàyì Baptiste to, kàvwa ànu musungìdiibwe to. Ki cyònsò cìvwàku ncyòci aci.” Ki mémè kupàya Bible wanyì mu dyàpà, mwikalè ndyàmbidila ne Mukalenge mmumbiikile bwà kuvwija bantu bònsò ba-Baptistes. “Ne muntu yònsò uvwa kàyì mwitàbuuje ànu mùvwà ba-Baptistes biitàbuuje to, kàvwa mu cimfwànyì to nànsha kakesè.”

79 Pàvwà matùkù ènda àpita, mvwa ngeela meeji ne mudimu wònsò awu ùvwa wà ngèza, mémè nkààyànyì. Kàdi ki mémè kulwa kujandula, mémè e kumòna mwanèètù mukwàbò uvwa ne èkèleeziyà, mpaasàtà. Ùvwa ùkòka pèndè bikolè menemene, ànu múmvwa ngèza amu. Ndekeelu wa byònsò, mbùlankètè’s ùyaayakù mutàngile kuvwàye pèndè aku, nudi bamanyè’s.

80 Dìbà adi tudi tujandula ne, tudi dijinga dyà ewu ne mukwàbò. Nènku mpindyewu, paanyimà pàà twètù bamane kwenza ntàntà bule nùnkù, bìdi ànu bu bikolè bwà kwenza cintu kakùyì mukwàbò to. Kwàjiki. Bìdi bitùkèngela ànu kwikala muntu ne mukwendè, mmùdibi. Ne ndi ngèela meeji ne ke cidi mu nkwaka munène wa beena mpenta ewu. Ndi ne disànkà dyà kumòna mikàlu yà dibènga kucyùka ayi munkaci mwa kuupuka, Èkèleeziyà munène wa Nzambi wàbangi kudyenza cimùkù mu bwobùmwe. Cidi cyùmvwija ne didyà dyà dibanji dyātāmbi kuseemena pabwipi menemene mpindyewu. Ne mabwe, nànsha mùdìwu mwa kwikala masongìibwe mu mùshindù wa pabwàwu, àdi ne mwaba pa mwaba kampànda mu nzùbu awu, piikalàwu mmabwe à Mukalenge.

81 Mpindyewu, dibàbà, mu mùshindù kampànda, didi cimfwànyì. Dìbàkà dyà pa buloba edi didi cimfwànyì cyà dibàkà dyà mu dyulu. Mpindyewu twànji kwakulapù, ànu bwà katanci kakesè cyanàànà, bwà kucyàmbulula katanci.

82 Cintu cyà kumpàla cidiku, kùdi ne cyà kwikala dipàngadika dyàngaciibwe. Cintu cyà kumpàla, cidi cyàngaciibwa, mu dibàkà dyà mu bufùki emu, ndipàngadika didi ne cyà kwangaciibwa. Inàbànzà mutekète awu ùdi ne cyà kwangata dipàngadika, dyà ne mmuswè nsongàalùme ewu anyi to; ne nsongalùmè, dyà ne mmuswè nsongakàji ewu anyi to. Kùdi ne cyà kwikala dipàngadika dyàngaciibwe, ne udi ne cyà kudyàngata. Ùdi ne cyà kwikala mukàji umwèpelè pa buloba ùdi munange, ne yèyè ùdi ne cyà kwikala mulùme umwèpelè. Byòbi kabiyi nànkù to, nànkù uvwa mwangàte dipàngadika dibi.

83 Ke mùshindù wà mwomùmwe ùdibi mu kwangata kwà dipàngadika bwà Kilistò. Cintu cyà kumpàla cyùdi ne cyà

kwenza, nkwangata dipàngadika dyà ne neùsadilè Nzambi ne kumwangata bu Musungidi wèbè, anyi kwàkwenza nàнку to. Neùkwacile maalu à pa buloba mudimu anyi? Neùkwacile Kilistò mudimu anyi? Udi ne cyà kwangata dipàngadika. Kùdi ne cyà kwikala dipàngadika dyangàciibwe. Dìbà dyúdi wangata dipàngadika, dyà ne neùsadile Nzambi anyi mammònà, dìbà adi udi wenza disungula dyèbè. Kàdi dipàngadika dìdi ne cyà kwangaciibwa.

⁸⁴ Nèнку pashìshe, paanyimà pàà dipàngadika dimanè kwangaciibwa, ne uyaaya kumpàla, dìbà adi ki didipika kulwadi. Diinè adi, nudi nudisangena ku cyambilu. Nudi ne cyà kwenza didipika kumpàla kwà didisanga edi kwikaladikù. Ke mùdìbi nàнку bwà Èkèleeziyà wa Kilistò. Cìdi ne cyà kwikalakù didipika ne Kilistò, mu—mucìpù, didipika, bwalu bwà mananga.

⁸⁵ Ne pashìshe, cintu cìdi cìlonda, cìdi—mmilayi myenza. Kùdi ne cyà kwikala milayi myenzelangana ewu ne mukwèndè, mùshindù awu ngunùdi nwenzelangana milayi. “Munanga wanyi, wèwè mwitabe ne nkusèlà, ndi ndaya ne nèngìkale mulondi wa mikenji ne wa lulamatu. Ncyàdyàkutàngila mukwàbò mukàjì to.” Anyi ne: “Ncyàdyàkutàngila mulùme mukwàbò to. Nèнку nèngènzè cyònsò cìdi bu mudimu, wà bu mukàjì. Twètù balelè bânà, nengenze mwányi mwònsò mmùndi mwà kwenza bu—bu maamù. Mémè—nengìkale mulami wa nzùbu.” Milayi yònsò eyi yìdi ne cyà kwenjiibwa, anyi mbìmpè yènjiibwa, mu dibàkà dijaalàme.

⁸⁶ Nèнку mbyà mwomùmwè paùdi ulwa kùdi Kilistò. “Mukalenge, bu Wèwè mwà kungaakidila mu Bukalenge Bwèbè, ndi ndaya.” Ki bwalu mbwòbù abu’s. “Mémè nenKunangè. NenKulamàte. Nenkusadile, muunyà ne butùkù.” Mbibi be patùdi tupwa aci mwoyi. “NenKusadile, muunyà ne butùkù. Nenjile byàkudyà. Nensambilè. NenKulamate. Nendwe ne byàdikumi byànyì mu nzùbu wa dilamina bintu. Mémè—mémè ne—mémè nensambilè, misangu yàbùngì ku ditùkù. Ne—nengenze cintu kanà cyònsò. Nendicìpe dinanga dyànyì dyònsò kùdiWèwè.” Cyòci aci ke cyúvwà ne cyà kwenza. Aci mmwòmò menemene, paùdi ucilaya apu, kàbidì cìdi ne cyà kufùmina mu mwoyi wèbè.

⁸⁷ Pawikala mulayè bàyèbè cyòci aci, kàdi kaciyì cyùmukila mu mwoyi wèbè to, kùyì wambidilamu to, kakùyì mpatà to kwèna musòmbe nendè mu mùshindù mujaalàme to. Ncyenze bu bwalu buuminyine.

⁸⁸ Tàngilà kùneeku. Wèwè—wèwè kùyì ne ménù to, kàdi mwashìshe à cyamù, mpindyewu, abi mbìmpè. Awu mmapingàne pa ménù aùvwà naawù. Kàdi, mu bushùwà bwà bwalu, awu ménù ki mmalamàkànangane neebè to. Ki ncitùpà cyèbè to. Bu wèwè ne di—dibòkò dikòsa, ne wèwè kwasa dibòkò dyanzeja, èèe, adi dibòkò mu bushùwà bwà bwalu kì

ndilamàkànangane neebè to. Dìdì ànu dilamika kùdì. Nwamònu anyi? Kí ndilamàkànangane neebè to.

⁸⁹ Nènku patùdì twenza mucipù wètù kùdì Kilistò, twètù katùyì bashààle citùpà Cyèndè to, ànu mùdì mukàjì ne cyà kushààla citùpà cyà mulùme ne mulùme citùpà cyà mukàjì amu, dībà adi tudi beena Kilistò batela ku byanza. Katwèna menemene. . . Kwèna menemene musèlangane ne mukàjì awu to. Udi mufwànyìne kwikala ne lulamatu. Wèwè kùyì munangè bàyebè to, ne yèyè ne bidimu makumi àsambòmbò anyi makumi mwandamutekète, kàdì wèwè kùyì mumunangè bímpè ànu m̀wv̀wà mununange ku cibangidilu amu to, dībà adi udi ànu munkaci mwà kumukoleshila b̀ǹǹa b̀ǹd̀e cyanàànà.

⁹⁰ S'ke mùshindù ùdì maèkèleeziyà ǹǹku awu, àb̀ung̀i be leelù ewu. Tudi twangata ànu d̀ǹǹa dyà “Èkèleeziyà wa Kilistò,” tudifwànyikijila mutùdì Mukàjì-musèla wa Kilistò. Pààbì, mbyà bitelakaja. Katwèna balamàkànàngàne ne Kilistò mu mùshindù ǹǹsha ẁm̀ẁe to. Tudi bu mùdì d̀ǹǹu dyà cyamù, dibòkò dyà cyamù, d̀s̀s̀u dyà cindundu. Nwamònu anyi? Ncintu cyenza kùdì bantu p̀t̀ẁikalà ànu tucivwàla. Èè, kwèna mwà kulwàta bwena Kilistò to. Bùdì naabò mbwà kwikala mulamàkànàngàne naabò.

⁹¹ Ǹǹku dībà adi èkèleeziyà kampànda udi ànu mukwàtakaja ku byanza, ùb̀ìkidiibwa ne ng'èkèleeziyà wa Kilistò, èèe, b̀ǹǹa abo dībà adi kabèèna Mwómò amu to, bàdì balediibwe ku bulolngolodi b̀m̀web̀m̀ẁe abu. Cìdì ànu. . . Kí mb̀ǹǹa bàà Kilistò to. Mb̀ǹǹa bàà cyena m̀ng̀umba, kàdì kí b̀ǹǹa bàà Kilistò to.

⁹² P̀ìikalà mukàjì kàyì muswìkàkane ne mulùme mu lulamatu, dībà adi kí mbayèndè to. Udi ànu mulùme ùdiyè mudicipe bwà kusòmba nendè, kàdì mmwenzè mucipù wà mafi. Ùvwa mudicipe bwà kumunanga, ne ùvwa mwambe ne ùvwa mumunange, kàdì kayi mumunanga to. Cikondo cyònsò aci, mulùme mmudingiibwe.

⁹³ Kàdì kùdì cintu cimwèpelè cyà bushùwà, balundà bàanyi, katwàkushima Kilistò to. Yèyè mmumanyè Bèndè sungasunga.

⁹⁴ Kàdì, nwamònu's, cyà kumpàla, mmapàngadika mangàciibwe. Cìdì cìlonda, didipika. Pashìishe, mulayi.

⁹⁵ Nènku, dībà adi, mushingà awu. Nènku ki pàdì mukàjì-musèla—mukàjì-musèla wàngata d̀ǹǹa dyà mubàki. Yèyè kèna kàbìdì dībà adi wa ku d̀ǹǹa dyèndè yèyè mwìnè to. Ùdi wàngata d̀ǹǹa dyà mubàki.

⁹⁶ Ne pashìishe pàdì Èkèleeziyà wènza mushingà, wènza milayi yèndè, dībà adi Yèyè ùdì wàngata D̀ǹǹa dyà Mubàki. Dībà adi Yèyè kacyèna kàbìdì èkèleeziyà wa bàà pa buloba to. Yèyè ùdì Èkèleeziyà wa Mukalenge Yesù Kilistò. Amen. Ki. . . Ncyèna muswè kwamba, ne, ku d̀ǹǹa to. Ndi muswè kwamba, ne, ku Dilediibwa, ku ngiikadilù, ku bukolè bwà Nzambì. Ku Bulelèlè bubuulula bwà Nzambì, mu mwoyi, Yèyè ùdì ùlwa

Èkèleeziyà wa Kilistò, Èkèleeziyà munène wa buloba bujimà wa cipostòlò wa Kilistò. Ùdi ùlwa citùpà cyà Kilistò. PàdìYe wènzà nànkù, Yèyè...Kilistò ùdi ùbweja munda mwèndè Nyumà Wèndè Sungasunga, Mwoyi Wèndè Sungasunga. Nènku Bible mmwàmbe, wàmabila Adàmà ne Evà, kuntu kwàka ne: “Kanúcyaena bàbìdì to, nudi umwe.” Nènku dībà dīdì mukàji, Èkèleeziyà, mmusèdībwe kùdì Kilistò, kabàcyèna kàbìdì bàbìdì nànsha. Bàdì Umwe. Kilistò munda mwèbè! Amen. Ki cyòci aci. Mwoyi Wèndè mmubwejiibwe munda mwèbè, dībà adi wèwè udi ulwa Mukàji-musèla.

⁹⁷ Dībà adi, cikwàbò cintu, paanyimà pàà yèyè mumanè kwenza micìpù yònsò eyi, ne bikwàbò, ne mushingà mumanè kwambìbwa ne:

⁹⁸ Bu mùvwà, dīnà dyà mukàjànyì dīvwa Broy kumpàla kwà kusèdībwayè. Mpindyewu, kàcyèna kàbìdì Broy nànsha. Dyèndè m’Branham. Mpindyewu, kàcyèna kàbìdì Broy nànsha. Dyèndè m’Branham.

⁹⁹ Nènku paùdì ubwela mu Kilistò, kwèna kàbìdì wa pa buloba to. Udi wa Kilistò. Nwamònu anyi? Dībà adi kwèna ucyùka maalu à pa buloba to. Mmafwe bwèbè wèwè. “Bwalu ewu udi munange maalu à pa buloba, anyi bintu byà pa buloba, dinanga dyà Nzambì kadyèna nànsha munda mwèndè to.”

¹⁰⁰ Pa nànkù, nudi numòna’s, kweèna mwà kwikala mwena Kilistò wa mutelakaja to. Udi mwà kwikala mwena Kilistò mutelakaja, wa ku dīnà.

¹⁰¹ Kàdì kwèna mwà kwikala mwena Kilistò to, kushààla aci, ànu too ne pàdì Kilistò ùdībweja Yèyè mwine, ku dibàtiiza dyà Nyumà Mwímpè, munda mwèbè. Dībà adi udi mulamàkànàngàne Nèndè. Kanúcyaena kàbìdì bàbìdì to. Nudi Umwe. Kilistò mmulaye bwà kwikala munda mwètù, bu mùvwà Taatù munda mwà Kilistò. “Mémè ne Taatù Wanyì tudi Umwe. Nwènù ne Mémè tudi Umwe.” Nwamònu anyi? Kilistò munda mwètù! Cyònsò cívwa Nzambì aci, Yèyè wàkacìpòngolwela mu Kilistò. Ne cyònsò cívwa Kilistò aci, Yèyè wàkacìpòngolwela mu Èkèleeziyà, bwà kutùngunuka ne mudimu wa Èvànjeeliyò.

¹⁰² Dībà adi tudi tulwa, kí nku dīna ditelakaja to, kàdì ku bulelèlè bwà Nyumà Mwímpè wa Mwoyi munkaci mwà kutùlamakaja mu Kilistò. Pashiishe, ku bukolè bwà dibìikà Dyèndè dyà ku lufù, tudi babiishiibwe ku bintu bifwè byà pa buloba, ne basòmbe Nèndè mu myaba yà mu Dyulu. Amen. Mémè ntu munange aci. Dilòòlò edi, tudi basòmbe mu myaba yà mu Dyulu mu Kilistò Yesù, nwamònu’s, babiike ku lufù pàmwè Nèndè; twakafwà ku maalu à pa buloba, ne kulwàtà Kilistò. Ne patùdì tulwàtà Kilistò, dībà adi maalu à pa buloba mmafwè, dībà adi katwèna tucyùka kàbìdì maalu à pa buloba nànsha. Maalu à pa buloba mmafwè kutùdì. Ne twètù tudi. . . Ne mbifwè kutùdì, ne tudi bafwè kùdìbì.

103 Udi muntu mushiilàngàne, buumùntù bushiilàngàne, bwalu udi bufùki bupyabùpyà. Bufùki! Kì mbufùki bùmwebùmwebè abu, bupeluja to; kì mu—muntu mubuulule dibèji dipyadipyà to. Kàdi muntu udi mufwè, ne mulediibwe cyàkàbìdi, ne mulwè bufùki bupyabùpyà mu Kilistò Yesù, ne Nyumà wa Nzambi udi ne mwoyi mmusòmbèle mu muntu awu.

104 Mpindyewu ànu bu mùdi mukàji udi kàciyi kàbìdi Broy awu, ùkaadi Branham, ne ùdi wènda ne dìnà adi.

105 Ne Èkèleeziyà kèna kàbìdi wa bàà pa buloba to, kàdi ùdi mu Dìnà dyà Kilistò, ke mùdiYe. Yèyè mmuswikila pàmwè Nendè, ku Mwoyi Wèndè Sungasunga.

106 Nukàadiku kacya babalè mu Mifundu, mùshindù ùvwà muntu wa kumpàla, uvwa Nzambi mwenzè, mùvwaye mu—muntu pàbìdi anyi? Adàmà ùvwà bònsò bàbìdi Adàmà ne Evà, mu ngaakwilù wa mu nyumà, kàdi mpààkenzàYe muntu wa kumpàla mu cimfwànyi Cyèndè sungasunga. “Ne Nzambi ùdi Nyumà.” Kàdi, pàakabàtèekàYe mu mubidi, Wàkabàtàpulula. Wàkangata nyumà wa bulùme, kumutèeka mu mulùme, ne kwangata nyumà wa bukàji kumutèeka mu mukàji.

107 Mpindyewu, paùdi umòna muntu mukàji ùjinga kwenza maalu bu muntu mulùme, kùdi cintu kampànda cipampàlámùke. Paùdi umòna muntu mulùme muswè kwenza maalu bu muntu mukàji, kùdi cintu cipampàlámùke. Pa nàнку mbimwèke ànu bu ne maalu à pa buloba mmapampàlámùke wònsò, leelù ewu. Balùme bàdi bateeta kwenza maalu bu bakàji; bakàji bu balùme. Ncyà bushùwà. Ncyà bulelèlà.

108 Mpindyewu tàngilàayi. Mbipwàngàne menemene, ne pàakangatà Nzambi ne kwenza muntu, ne bwà kuleeja ne Yèyè kàvwa muswè bwà kupàtudiibwayè mu cingà cintu cishiilàngàne to, mukàji kàvwa mu bufùki bwà ku mbangilu to. Kì kaayi kèna mu bufùki to, kàdi ùdi citùpà cyà Adàmà. Ncintu cyumusha ku cikwàbò. Ùdi ùya mu lubadi lwà Adàmà, kì mbwà kwenza cifùkiibwà cikwàbò to, kàdi kwangata citùpà cyà cifùkiibwà ne kwenza cikwàbò cifùkiibwà cipàtula mu cyòci aci. KwangataYè nyumà wa bulùme uvwa munda mwà Adàmà awu. . . Ne kwangata nyumà wa bukàji uvwa mu Adàmà awu, èyowà's, e kumutèeka mu mukàji. Ke, nyumà ne mubidi, byònsò kulwa umwe.

109 Cìvwa cimfwànyi cilengalengàayi cyàkenzà Nzambi ku Kàlvaryò. Wàkangata Kilistò, e kuMulamakaja ne Èkèleeziyà, ku lubadi lutùbula, Wàkatwàlà Mashì àkasukula muntu, àdi àjidila mubidi wà Èkèleeziyà, ne àbweja Nyumà wa Nzambi udi ne mwoyi, wàkapàtulaYè ku nkùrusè kwàka, ùmupàtula mu Kilistò, ne ùMubweja mu muntu-nkààya. Dìbà adi bàdi umwe. Bàdi bàlwa umwe. Kilistò ne wèwè nudi umwe.

110 Ne wêwè ne bàyèbè nuwua ne cyà kwikala umwe. Kwôkò kwikàle cintu kanà cyônsò cyà cibèngangana, dîbà adi kùdi cintu cipampàlàùmùke ne dibàkà dyènu.

111 Ne kwôkò kwikàle cintu cyà cibèngangana kutùdi, ne Kilistò, katùyì twitabuuja Dîyì Dyèndè to, twamba ne: “Kaa, aci’s cívwa mbwà matùkù makwàbò,” kùdi cintu kampànda cipampàlàùmùke mu disangila dyètù Nèndè. Wêwè wamba ne: “Matùkù à bishimà àkaadi mapite; kakwèna dyondopa dyà kùdi Nzambì to; kakwèna dibàtiiza dyà Nyumà Mwîmpè to,” utèeka aci ku matùkù à kale mwaba kampànda, aci cìdi cileeja ne Nyumà wa Kilistò kènà munda mwèbè nànsha.

112 Bwalu: “Ku cibangidilu kwàkadi Dîyì, ne Dîyì dyàkadi ne Nzambì, ne Dîyì dyàkadi Nzambì. Ne Dîyì dyàkavwijiibwa mubidi.” Nànku dîbà adi Dîyì Dyèndè dilwa ne bukòokeshi munda mwèbè, dîbà adi, nudi numòna’s, apu wêwè ne Kilistò nudi umwe dîbà adi. “Nwènu bashààle munda Mwànyì, ne Dîyì Dyànyì munda mwènu, nudi mwà kulòmba cinùdi baswè aci,” bwalu kacicyèna nwènu kàbìdi to. N’Dîyì dyà Nzambì, Kilistò munda mwènu. Nudi nulwa umwe. Èyo.

113 Dîbà adi, cintu cikwàbò, paanyimà pàà mukàjì mumanè kwenza nànku, paanyimà pàà yèyè mumanè kukùmbàja malaya èndè, ne mwangate dibàkà dyèndè, mwangate dîna dyà bàyèndè ucilwalwa awu, dîna dyà mubàki, dîbà adi wàlu mupyànyì wa byònsò bìdi mulùme naabi. Yèyè ki mupyànyì wa byònsò. Mukàjèbè ke mupyànyì wa byònsò byùdi naabi.

114 Nènku ki cintu cìdi Èkèleeziyà ncyòci aci, bu Wikalaku ànu mucimanyè’s, bu mùdiye citùpà Cyèndè ne Nyumà Wendè munda Mwèndè. Yèyè wàkamba ne: “Byenzedi bìndi Mémè ngèza nenùbyènzè pèènu. Nènwènzè binène bipite ebi, bwalu Ndi nya ku Taatù Wanyì. Katanci kakesè, ne bàà pa buloba kabààkuMmòna kàbìdi to; kàdi nwènu nenùMmòne, bwalu Nèngiikalè neenù, munda mwènu mene, too ne ku ndekeelu kwà buloba.” Dîbà adi n’Kilistò munda mwènu. Nudi balamakaja pàmwè, ne nudi bapyànyì pàmwè Nèndè.

115 Kàdi bu Yèyè mwikàle pa buloba apa, nncinyì cívwaYè mufwànyine kwikala wenza? Cintu cimwècimwè cyàkenzàYe aci, bwalu Yèyè ùdi umweumwe awu makèlèlèlè, leelù, too ne kashidi. Úvwà mufwànyine kwikala wèlangana meeji ku maalu à Taatù. Úvwà mufwànyine kwikala wòndopa babèedi. Úvwà mufwànyine kwikala wèza bishimà. Úvwà mufwànyine kwikala wèza menemene ànu byàkenzàYe pàvwàYe pa buloba abi apu, bwalu Yèyè ùdi ùshààla umwèumwè awu makèlèlèlè, leelù, too ne kashidi. Cìdi ànu cipwàngàne. Ki dibàkà ndyòdi adi.

116 Kàdi, mpindyewu, kàdi mukàjì ewu yèyè musèdiibwe, mwenze malaya wònsò aa ne bintu byònsò, ne kushààlaye bàyèndè wa mulùme ewu, kàdi pèndè mwikàle mupyànyì

wa byònsò bìdiye naabi, ne bikwàbò, kàdi díbà adi yéyè kutomboka? Mukàjì awu wábangi ntèndàkàjì. Ùbanga apu, wènda ùlonda balùme bakwàbò. Kaciyi ànu aci nkààyàci to, kàdi ùdi wènda wàbanyangana dinanga dyèndè ne bakwàbò. Mulùme ne mukàjèndè, milayi yònsò yivwàbo benzè ayi, kàdi pashiishe mukàjì awu kupàtukaye ùbanga kwabanyangana mwoyi wèndè ne bakwàbò, dinanga dyèndè ne majiyà èndè ne bakwàbò.

117 Aci ke cidìbo bènza kùdì bààbùngì bàdi bàdìbìikila ne mbeena Kilistò, nwabanyangana dinanga dyènù ne maalu à pa buloba: banàya, bàja maja, bàtwa twarta twà mfranga, bàshààla pambèlù bàpùmbisha mu masangisha à milòmbò, bwà kubandila tèleviziyò, bintu byà pa buloba byà mishindù yònsò bìdì byàngàte kaaba kàà dinanga dyà Nzambi, mu mwoyi wà èkèleeziyà abi. Mmudìtwe mu ntèndàkàjì. Mmutombòke. Mmupàtùke wènda ùlonda balùme bakwàbò. Ùdi wènda wàbanyinangana dinanga dyèndè. Ùdi wàngata byàdikumi byèndè bìvwàye mwà kufila mu èkèleeziyà; neàbitùulè ku bintu bikwàbò pambèlù pààpa mu maalu à pa buloba. Yéyè neikalè... Pamutù pàà kunanga Nzambi mùshindù wùvwàye ne cyà kwenza, ne kwikala ne mwoyi bwà Nzambi, ne kunanga bwà kulwa mu èkèleeziyà, bikààdi bikèngela bwà wèwè kumusengeleela bwà kulwayè.

118 Mòna's, ndi mumanyè, muneemu àbìdì àdì panshi aa, mwa—mwambi kampànda kungambilayè ne mmutùme masambila àbùngì menemene... twarta twàbùngì menemene, bwà kufikisha bantu ku ditwàbo cyàla, ne bàvwa ne cyà kudicìpa ne nebàlwe mu kàlaasà kàà Dyàlumingu nànsha ngondo yisambòmbò munda mwà cidimu cyònsò.

119 Nènku mèmè kumòna kànà kàà bakàjì kakesè kàà kalè kwìnshì kwà kakùnà kwàka, kùmvwà ngènza mudimu. Kupàtukakù kuntwaku. Nènku mvwa mwimàne ku ciibi, nkòkola ku ciibi, ki yéyè kulwayè ku ciibi aku. Nènku yéyè mwànà wa bakàjì awu ùvwa umwe wa ku mpuusù yà cisuku minàyi eyi, nudi bamanyè's.

120 Bu musùmbà ewu ùvwàbo ne cyà kukwàcisha kwìnshì eku mu Phoenix dilòlò dyàshàadi edi, ngèela meeji ne mmwòmò, mbènza ditwìshà dyà maalu katungu dipyadìpyà dyà—bìdùndadùndà, anyi bajì bàà maja bàà badinyonda mu cimònu abu, ní ncinyi cyònsò civwàku aci, ne bàvwa ne cyà kakèba bampùlushi bwà kulwa kubàkwàtabò. Bansongà wa yààya, kanwènaku nuumvwa ne aci mmukìshì wà dyabùlù anyi? Ku bwenzeji, mu mùshindù wà ne kabàvwa bamanyè civwàbo nànsha, pambèlù mu mìsèèsù, bènda benza maalu à lukutukutu.

121 Bu bàmwè bàà ku beena bikàsà aba, anyi beena manàyi aba, ne babàndi bàà pa tubalu ne bikwàbò byònsò, bàya mwaba kampànda, mu cimenga mùmvwà amu. Nènku bainàbànza batekète bàvùula tùpùtulu twàbò twà mwìnshì bàtùkùpa ku

cibùmbà, bwà nsongààlùmè ewu kutwàyepù cyàla cyèndè. Kanwènaayikù nufika ku dyumvwa ne aci ndyabùlù anyi? Cintu's nnyumà wa matùkù à ndekeelu. Ncyà bushùwà. Mbundu bwà menemene. Ki bwalu mbwòbù abu, batombòke.

¹²² Mukàjì mutekète ewu, ùdi ùpàtuka, wènza maalu à lukutukutu. Kàvwa nànsha mumanyè ne mvwa...Mupwè mwoyi ne mémè mvwa mwimàne ku ciibi aku. Ki yèyè ne: “Kaa, mfwilèku luse. Mvwa mupwe mwoyi ne wèwè uvwa mwimàne mwaba awu.” Ki yèyè kutwa mulùmyànà uvwa ku cisanji awu mishìku, ní ùvwa nganyi apa, e kwamba ne: “Netùtwilangane neebè ku Greenbrier Patch,” anyi ní pàvwa penyì apa. Bàvwa ne cyà kuya kajà maja kampànda dilòlòlò adi.

Ki mémè kwambila Docteur Brown, uvwa mulunda wanyi.

¹²³ Kwambayè ne: “Disangisha dyèbè didi bishi kuntu kwàka's, Billy?”

Mémè ne: “Bilenga.” Mémè kwamba ne: “Tudi tubàpèèsha tumuma.”

Yèyè ne: “Tumuma twà bishi atu?”

¹²⁴ Mémè kwamba ne: “Èvànjeeliyò. Twòtù atu ke tùdi tubàvwiya mu masangisha misangu yònsò.” Nwamònu anyi?

¹²⁵ Ki kungambilayè bwà cyòci aci, kutwà kwà cyàlà pa micìpù ayi. Ki mémè kwamba ne: “Docteur Brown, udi wela meeji ne munayi wa manayi à mpusù wa cisuku ku cisanji aci awu mmufwànyine kufikisha nsongààkàjì wàwa ku ditwà cyàlà ku mucìpù wà ne neikale kuntwaku dilòlòlòlò adi anyi? Nànsha kakesè. Mufwànyine kweyeka bilàmbà byònsò bìvwàye muvwale abi, bwà kufika kuntwaku.” Bwà cinyi? Ncintu kampànda cìdì munda mwèndè cìdì cimulamàkàje, nyumà kampànda, wa manayi à bukwapanu.

¹²⁶ Ne pàcìdì ànu Èkèleeziyà wa Nzambì udi ne mwoyi, udi mubùikidiibwe ne Mukàjì-musèla wa Kilistò awu, kàyì mwanji kulamakana ne Nzambì mùshindù awu to, neikale ànu wènda ùdivwànda mu maalu à pa buloba, mu bitoci byà mpèkaatù, too ne pàdiye ùpetangana ne Nzambì mu mùshindù wa ne, too ne mwoyi wèndè wùdi mùjìibwe tètè ne butùmbi ne bukolè bwà Nzambì, too ne pàdiye kàciyi mwà kumòna cingà cintu to ànu Kilistò. Ncyà bushùwà.

¹²⁷ Aci ke citwìkalà ne cyà kwenza. Aci ke ndongamu ùmwèpelè, ndongamu ùmwèpelè udi Nzambì nèndè, ngwa kwenza cintu cyà mùshindù awu. Kabyèna binùkèngela kwikala babwejamù ku ditelakaja nànsha. Nudi ne cyà kwikala balediibwemù, kí mbabwejamù tu dinyùkusha to, anyi kutwàla mukàndà mufùndila èkèleeziyà to. Kàdi kwikala mulediibwe mu Èkèleeziyà wa Nzambì udi ne mwoyi, ku difùkuludiibwa, ku bukolè bwà dibìikà dyà ku lufù dyà Yesù Kilistò, aci cidi

cikuvwija cifukiiibwà cipyacipyà munda Mwèndè. Amen. Aci cidi cilongolola bwalu. Ki cidi cicyenza. Bushùwà. Èyo.

128 Ùdi ùtomboka. Ùdi utwàdija kwabanyangana dinanga dyèndè ne bakwàbò, bintu byà pa buloba, manayi à pa buloba wènda ùya myaba yìvwàye kàyì mwà kuya to, munkaci mwà kwàmba bintu bìvwàye kàyì mwà kwamba to.

129 Muneemu emu musangu kampànda mvwa. . .Bàvwa ne bainàbànzà. . .fete wa èkèleeziyà wa mùshindù kampànda ku nzùbu yà bilàalakùulù. Ke kwenzekabi ne mvwa ngèza cintu kampànda mu cibambalu cyà mwinshì mwà nzùbu awu. Kàdi ndi nnwàmbila ne, mvwa mumvùmvweku bintu kampànda byà byèza bwòwà pancivwà ngèzàmpèèkàtù, kàdi, cisangilu cyà bakàji aci, ncitu mwanji kuumvwa minèkù mibyamiyàlà mipite ayi to kacya bàndelèè. Nudikù mwà kudifwànyikijila, muntu udi mubiikidiibwe ne mwena Kilistò, mmufwànyine kulekela bukooya bwà mùshindù awu bupòngolokela mu yèyè anyi?

130 Kwèna mwà kusuna mâyi mashémè ne mimpè mu ciinà cimwècimwè to. Udi wela mbekeci mu ciinà, ne ùdi ùpàtuka mùle tètè ne misàndà, mutùtù tuyibikila amu. Paùdi upwekesha mbekeci cyàkàbidì, neàtwalè cintu cimwècimwè aci. Ciinà cyà mâyi aci cidi dijinga ne disukudiibwa, ne dyujiibwa ne mâyi mimpè.

131 Ki bwalu bùdi kùdi èkèleeziyà leelù ewu abu, patùdi twakula bwà buloba bujimà, ne ùdi ùkèngela disukudiibwa, dyujiibwa ne mâyi à cijila à Nzambi àdi àfùmìna mu Dyulu. Mwoyi wèndè mmulwè ciinà cyà bukooyà bwà cintu kanà cyònsò cilwalwà. Ùdi ne bananga bàà mishindù yònsò. Bible mwàmbe ne ùvwa ne cyà kwikala naabò. “Banangi bàà bisànkasanka kutàmba kwikala banangi bàà Nzambi, bashipi bàà bipungi, bashiminyinyanganyi bàà maalù, kabàyi ne kudikànda, ne bapeetudi bàà aba bàdi baakàne.”

132 Bàmòna mukàji udi uteeta kwikala ne nsòmbelu mujaalàmè, mulùme udi uteeta bwà kwikala ne nsòmbelu mujaalàmè, ùdi ùlwa “munsantu mubunguluki wa mu malaba,” ùdi ùlwa “mukoleshi wa maalù,” anyi cintu kampànda cyà cyena kale. Mmupetùdiibwe ne mwipàciibwe kùdi bantu bàà pa buloba ebu. Neyà bushùwà.

133 Kàdi nukààdikù bamòne cidi Èkèleeziyà mulelèlè ne cyà kwenza anyi? Mu Dipungila Dikùlùkulu, pàvwàbo ne—mulàmbù, bàvwa bàshipa nyuunyi umwe, ne bèèla mashi à umwe pa mukwàbò, mwena dyèndè mufwè awu; ne ùvwa ùbùuka ùpicila pa buloba, wènda ùmacisha mashi à mwena dyèndè mufwè awu. Pàdi Èkèleeziyà ùlwa Mukàji-musèla mulelèlè wa Yesù Kilistò, Yèyè neàmbole Mashi à Yesù Kilistò, wènda ùàmmyamina pa buloba, wènda wàmba ne: “Wa cijila, wa cijila, wa cijila, kùdi Mukalenge.” Cyuyuyà cyèndè, kèndè katùpà ne katùpà kwònsò nekiikale diswà dyà Nzambi. Ngiikàdilù wèndè

yônsò neikalè wa Nzambi. Kwênà mwà kutèkemenà cingà cintu nànsha.

¹³⁴ Ki bwà cinyi bantu bàtù bàlwa pààbò, mu èkèleeziyà. Ki mbwà kunàya twarta ne kutwà karta kà ambula mfùmù, kujà maja mu nzùbu wa mwinshi mwà buloba, kudyà bidyà byà dilòòlò ne bintu byà mùshindù awu to. Abi mbyà bàà pa buloba. Ne katwàdyàkukùmbana bwà kudipàlakaja naabò nànsha, ne bundù bwètù bwà kuteeta cyôci eci. Bivwa bikèngela bwà twètù kuyiisha Nyumà Mwîmpè, mu bukolè, ne dibîikà dyà ku lufù dyà Kilistò. Tudi ne cintu kampàndà cidîbo kabàyi naaci to. Twikalàayi ne nsòmbelu wa cyôci aci, katùyi tuteeta bwà kubàtentula to. Biikale ne nsòmbelu wa citùdi bamanyè ne ke cyakàne. Biikalè ne mwoyi mu Kilistò. Yesù wàkamba ne: “Pangàambwibwà muulu, Nenkòkè bantu bônso kùndi Mémè. Nwènù nudi mukèlè wà bàà pa buloba. Kàdi mukèlè wòwò mujimije ditwà dyàwù, díbà adi kawèna ne dikwàcisha ku kantu nànsha kàmwè to kàdi ngwà dimansha ne kudyaciibwawù mu makàsà à bantu.” Majaadiki ètù!

¹³⁵ Kabyèna bikèmesha, nànsha misùmbà yètù yà beena Mpenta, nànsha mùndi ngùmvwà bibi bwà mémè kucyàmbe emu, misùmbà yètù yà beena Mpenta yìdi yikùluka ànu mu cintu cimwècimwè aci, ànu mu lùpòndà lùmwèlùmwè alu. Kabyèna bikèmesha pàdi bantu bàmba ne kabèna ne cidîbo bàmba ne bàdi naaci aci nànsha. Èkèleeziyà ewu wa nkwaka wa cyena Mpenta ùvwà ne cyà kwikala muswikàkane pàmwè ne bukolè bwà Nzambi wa Bukolè bwònsò, too ne pàvwà Mwoyi mene wà Yesù Kilistò ne cyà kumwènèshiibwa mu Yèyè.

¹³⁶ Kàdi tudi baswè kutentula maalu à pa buloba. “Netùcyènzè, nànsha bishi.” Nwamònu anyi? “Tudi baswè kwikala ne wètù mùshindù wà dicyènza.” Kàdi kabìvwà bikèngela bwà twètù kucyènza to. Mbibi bwà kucyènza. Èkèleeziyà yìdi ànu mùdi mukàji emu, mmitombòke.

¹³⁷ Cintu cyà kumpàla cyà nwènù kumanya ncyà ne, ùdi ùlwa bìmpè, ku cibangidilu pààkalelà Nzambi Èkèleeziyà wa beena Mpenta ewu, kùkaadi bidimu bitwè ku makùmi ànaayi anyi makùmi àtaanu. Úvwà ne nsòmbelu wa cijila. Úvwà wa cijila. Bukolè bwà Nzambi bùvwà nendè. Kàdi patùdi tutùngunuka, tubanga kufwànangana ne maalu à pa buloba.

¹³⁸ Katancì aka anyi, bikèngela twikalè ne nzùbu udi munène menemene kutàmbea too ne wa ba-Méthodistes udi dînsambù dyà njila dyàya wàwa. Tudi ne cyà kwikala ne cintu kampànda cinène menemene, cintu cyà citàmbea bunène menemene, ne cintu cyà citàmbea bunène menemene, ne cintu cyà citàmbea bunène menemene. Aci's mbundù. Bàbúngì bàà kutùdi tudi tulwa ne madyùja patùdi tupeta. . . Mwanèètù wa beena Mpenta ùdi ùmòna muntu kampànda kwinshi, kaèkèleeziyà kakesè, anyi kaèkèleeziyà kakesè kàà bantu babala ku minu, kàdi bàya

mu èkèleeziyà munène. “Twètù tudi bàà mu èkèleeziyà wa kumpàla, anyi èkèleeziyà munène,” anyi cintu cyà mùshindù awu; ùbàpeepeja.

¹³⁹ Cìdì cinùkèngela Nyumà Mwímpè, bwà kunùpwekeshaku mupùyà ndambù, ncyà bushùwà, ne kùnùmanyisha ne dibàtiiza dilelèlè dyà bushùwà dyà Nyumà Mwímpè nedyenze bwà ne muntu udi mulwàte nkwòci eelè muntu udi mulwàte cìsalàbetà mabòko ku nshìngù wàmba ne: “mwanèètù.” Mwómò. Lupàndù lulelèlè lwà nkulunkulu, bukolè bwà Nzambì wa Bukolè bwònsò, èyowà, mukalenge, nebwènzè ne muntu mulwàte nkanzu wa swà ùpakilè ewu udi mulwàte kàzàngula, wàmba ne: “Mwanèètù wa bakàji, ndi mukunangè.” Mbushùwà nedyenze nàнку.

¹⁴⁰ Kàdi twàbangì kupàtuka ne bukwapànu, tulondangana ne nkwaka. Èkèleeziyà wetù ngudi wenza nàнку. Kabyèna bìkèngela bwà twètù kwakula bwà ba-Méthodistes ne ba-Baptistes kàbìdi to. Ntwètù biinè. Cìdì munkaci mwètù twètù. Ki bwà cinyi Nyumà Mwímpè kèna mwà kukwàta mudimu nànsha. Ki bwà cinyi ndi ngàmba ne Nzambì kèna mwà kutèèka dyanyisha Dyèndè pa bulongolodi kampànda dilòlò edi to. Bwalu, bàà Bisàmbà byà bendè kabàvwa bangàciibwe bu ditungà nànsha. Bàvwa cisàmbà cipàtùke mu bàà Bisàmbà byà bendè, bwà bwalu bwà Dìna Dyèndè. Nzambì neàngatè bantu-nkààyà.

¹⁴¹ Mpinndyewu, ndi ngèlè meeji ne malongolodi ètù àdi ènza mudimu mwímpè. Abi's mbímpè. Kàdi kwèna mwà kweyemena aci to, wamba ne: “Ndi mwena mpenta, bwalu ndi wa mu bulongolodi bwà cyena Mpenta nànsha.” Wèwè udi mwena mpenta paùdi upeta dilabula dyà mpenta. Nànsha wèwè mwikàle wa mu èkèleeziyà wa Kàtòlikè, udi mwena mpenta. Kwèna mwà kuvwija Mpenta bulongolodi to. Mpenta ndilabula, kì mbulongolodi to. Nènku aci ncyà bushùwà.

¹⁴² Kàdi twètù beena Mpenta tudi babange kwela meeji, bwalu tudi ne dìnà dyà Mpenta, tudi mwà kutùngunuka ne kwikala ne nsòmbelu wa bàà pa buloba, kwenza cyònsò citùdi baswè kwenza aci. Tudi bu bàdi bènda babànda kàleyi kàà Nimèlòdòdà; nekàbùtuke butubutu. Bu mùvwà civwàlù cyà dibèjì dyà mfigì cyà Adàmà; necipinganè cyànyimà. Bu cimanu cyà Siegfried mu France, cimanu cyà Maginot mu Allemagne; cyàkuupuka.

¹⁴³ Bwalu, kakwèna kàleyi kakwàbò to, kakwèna kaaba kakwàbò kàà kwimanyina to. “Kàdi Dìna dyà Mukalenge didi kàleyi kakolè kàdi baakàne banyeemenamù ne basanganyiibwa bakùbiibwe bìmpè.” Paùdi unyemenaMù, udi wangata Dìnà, Dìnà; kaciyi ànu kubìkila Dìnà kampànda to, kàdi Dìnà ne muntu mene ùdi wèwè awu, mufwànàngàne ne Kilistò mu nsòmbelu. Amen. Yèyè mMulenga wa dikèma. Èyowà.

¹⁴⁴ Èkèleeziyà mmwènze byà mwomùmwè, mmwendè masandi à mu nyumà, mbu mùdi mukàji kampànda udi mufwànyine

kwabanyinangana dinanga dyèndè udyùmusha kùdi bàyèndè ùdituma kùdi mulùme mukwàbò. Awu mukàji kèna ùkùmbana bwà kusòmba nendè nànsha. Nudi bamanyè aci. Ne díbà dikaadi èkèleeziyà ùbanga kwabanyangana bwobùmwe bwèndè ne maalu à pa buloba, Nzambi ùtu Nzambi wa mukàwu. Wàkiipata Izalèlèlà bwà bwalu abu, ne Mwan'Èndè neipate cintu cìmwècìmwè aci.

¹⁴⁵ Yèyè neikale ne Mukàji-musèla udi kàyì ne mufudì munda Mwèndè to. Amen. Mukàji awu mmwowèshìibwe nkòong ku Mashì Èndè Yèyè à sungasunga. Ncyà bushùwà. Pa nàнку tуди tumòna kaaba katùdi biimane, didyà dyà dibanji didi dyènda dilongolodiibwa bwà kulwadi.

¹⁴⁶ Mpindyewu, tуди tujandula ne ùdi wènda masandi à nyumà, ùpàtuka ne byà pa buloba, ùjikula cintu kampànda, mwikàle ne nsòmbelu wa cintu kampàda cishìilàngàne. Abi kabyàkukùmbàna to. Cìdi èkèleeziyà ne cyà kwenza, nkwenza bu mwàkenzà Esther. Esther wàkabènga bwà kudìlengeja bu bàà pa buloba.

¹⁴⁷ Tуди bamanye mukànda mukesè wà Esther awu, mùshindù ùvwà Modèkàayi... Tatwèndè mukwàbò ùvwa ne mwànà wa bakàji. Ne mùvwaye mu cikondo cyà makòòkeshi à beena Medàayi ne beena Pelèsà. Ncìmfwànyì cilenga be mwaba awu. Mfùmù, umwe wa ku bamfùmù bàà batàmbe bunène bàà pa buloba ditùkù adi, ùvwa ne difestò dinène. E kubìikilayè mukalenge mukàji bwà kulwayè kusòmba ku luseke kwèndè, kàdi kàkaswa kulwa to. Wàkabènga bwà kucyènza. Nàнку ncinyì cyàkenzàye? Ùvwa mupwekèshìibwe milongo bibyabìbyalè, kàkamanya cyà dyenza to, bwà mukàji wèndè yèyè kàyì wànyisha bwà kulwa.

¹⁴⁸ Ngèèla meeji ne bìdi nàнку bikolè bwà Kilistò leelù ewu. Kilistò mmutùbìikile bwà twètù kusòmba Nèndè mu myaba yà mu Dyulu, kàdi tуди ne bundù bwà bwalu abu. Bantu bààbùngì bàdi bàdyùmva bundù bwà kwamba ne bàdi ne dibàtiiza dyà Nyumà Mwìmpè. Beena Mpenta, ncyà bushùwà, bàdi badyumvwa bundù bwà kucyàmbe. Tуди tuMuumvwa bundù.

¹⁴⁹ Nàнку awu mukalenge-mukàji awu kààkaswa kulwa to. Wàkabènga bwà kulwa. Cyàkapwekesha mfùmù milongo. Kwìsù kwèndè kwàkakùnzubila. Bantu bònsò e kucimònabò.

¹⁵⁰ Ndi ndikonka ne kwìsù kwà Yesù kakwèna kukùnzùbile ndambù, kwòkò pàakù, pàdiye ùtùsòka bwà mudimu kampànda, ùsòka nkwaka wa beena Mpenta bwà bwobùmwe ne bwànà bwètù, kàdi tуди batàmbe kulamakana bikolè mu tusumbu tukesè tulongolola mu mùshindù wà ne katwèna bàswe kushintuluka bwà mukwàbò to. Tуди batàmbe, batàmbe kwikala bàà maalu à pa buloba ne bintu byà nàнку awu, tуди twènda tuumvwa bundù bwà dìnà dyà Mpenta. Bàmwè bantu bàdi

bàciina bwà kwamba. Kwamba ne: “Èè, mémè—mémè’s ndi wa mu. . . Ndi mwena Kilistò, kàdi. . .” Mémè ndi ne disànka bu mündi mupete dilabula dyà mpenta. Amen. Ndi ne disànka dyà kwambula Dìna dyà Yesù Kilistò. Ndyèsè ditàmbe bunène dindì mupete, dyà kwamba ne ndi citùpà Cyèndè.

¹⁵¹ Mpindyewu tudi tusangana ne, pashiishe, e kupetayè bàmwè bafidi bàà mibelu, bwà kukonka cidiye ne cyà kwenza. Ki bôbò kwamba ne: “Eci cyôci cididinge citungunuke mùshindù ewu, bakàji bakwàbò bônso bàà mu ditungà dijimà nebàngatè cileejilu cyà mukàji wa mfùmù awu.”

¹⁵² Mu bushùwà bwà bwalu, ki cidi cyènzekà dilòlò edi ncyôci aci. Ndi ntàngila bàmwè bàà ku bakàji aba. Ndi ntékemena ne ncyèna nnutàpa ku mwoyi to, kàdi nànsha nàнку ndi nnùtàpa, ndi ntékemena ne ndi nnùtàpa. Uh-huh. Cyà bushùwà. Ûteeta bwà kwikala cintàkanyi eci cyà mukàji wa mfùmù, ne cisuba cyà nsuki. Ncítukù mwanji kumòna byà nàнку awu to kacya bàndela.

¹⁵³ Ditùkù dikwàbò kùvwa mukàji kampànda wàkabwela mu makàjiinyi mùmvwà mwindile mukàjàanyi, ne mutù wà mukàji awu ùvwa mòna bunène’s, kàbidì ùvwa ne cilaabu cyà màyi à matàmbà mwinshì mwà mèsù èndè emu. Mémè e kwamba ne: “Alùkilà, mukishi. Ndekelè kwànyi kwà tàlàlà.” Cívwa cintu cyènta bwòwà bwà kucimòna. Ncifwànyine kukukwàcisha bwòwà. Ncinyi aci? Inàbànzà wa kumpàla. Ki inàbànzà wa kumpàla nyèyè awu. Ki cyôci aci. Nèнку bàdi bàngacila cileejilu ku cyôci aci.

¹⁵⁴ Kàdi lekèlaayi nngambe eci mpindyewu. Ncívwa ncyàmbe mu minèkù to, kàdi mu lusumwinù, bwà nwènù kucimòna. Aci’s ki cyôci menemene cinùdi nwènù beena Kilistò bàà kale biikale nwenzela bansongà aba. Cyà bushùwà menemene. Nudi ne cyà kwikala bileejilu. Nwènù beena Mpenta bàdi bàjikula ne nudi ne Nyumà Mwimpè aba, nudi ne cyà kwikala cileejilu bwà ba-Méthodistes, ne ba-Baptistes, ba-Presbytériens. Kanùyi nwenza bu mukàji wa mfùmù awu to, kàdi nudi benzèjilbwe bwà kwikala wa Yesù. Yèyè ùdi ùnwàmbila *Apa* cyà nwènù kwenza, mùshindù wà kucyènta. Tudi ne cyà kulonda tunungu Twèndè ne bileejilu. Kàdi awu ke mùshindù ùtùdi bacisangàne. Esther. . .

¹⁵⁵ Mukalenge mukàji ewu, kàvwa muswe kucitèeleja to. Kàvwa muswè kulwa to; wàkamufwisha bundù. E kwambabò ne: “Piikalàbi—piikalàbi ne mukàji wa mfùmù nyèwù wáfidi cileejilu cyà mùshindù ewu, bakàji bakwàbò bônso bàdi bashààle nebàcyenzè. Pa nàнку dībà diikala mulùme ùbiikila mukàjèndè, mukàji neàmbe ne: ‘Kucinkàtuki kwaka.’” Nwamònu anyi? Balùmyàna, ùvwa mudyànjile kwamba bwà Àmèrikè, ki mmwómò anyi? Mpindyewu, tudi tujandula ne, mu kwenza kwà nàнку awu, dībà adi kùvwa muntu kampànda

uvwaku ne lungènyi mu yèyè, e kulwayè kubwela mu cisangilu ne mfùmù. Yèyè kwamba ne: “Cintu cyà kwenza nkumwipata. Ne kutùma mukenji mu ditùnga dijimà, ne kubìikidisha baavirgò bônso bàdimu, baavirgò batekète, ne mwômò amu udisungwilèmu mukàji kampànda.”

¹⁵⁶ Byàkasànkisha mfùmù. Pa nàнку ki kutùmayè dīyī, e kupātulayè bakàji beena mudimu bàà mfùmù, ne bakwàbò, bwà kuyabò ka—kakèba baavirgò batekète bàvwàbo mwà kupeta abu, bakàji balengele munda mwà makalenge wónso ne ma provinces àvwàye ùkòòkesha awu, àvwà matàmbe bunène pa buloba.

¹⁵⁷ Pààkenzàye nàнку, e kupetekakù mwànà wa bakàji mutekète wa beena Yùdà. Ùvwa ànu bu muntu mudyombola, bwalu, bu mùvwà baa Bisàmbà byà bendè, nudi numòna’s, ùvwa mudyombola mwimansha ku luseke. Wa bwalu awu kàyì tatwèndè ne mamwèndè nànsha. Kàdi Modèkàayi, tatwèndè mukwàbò ke uvwa umukolesha. Nènku ùvwa ne cyà kuya, bwà katembangana.

¹⁵⁸ Nènku ke cyàkenzàbo, bàvwa ne cyà kubweja bàna bàà bakàji aba mu nzùbu bwà kukezudiilwabò munda mwà ngondo bùngi kampànda. Bàvwa ne cyà kubèèla mànànanshi ne kwenza mìshindù yónso yà bilengejilu, ne kubààkaja bônso, bwà bààmòna mwà kuya kumpàla kwà mfùmù.

¹⁵⁹ Mpindyewu, aci cìdi ànu mùshindù wùdi bàà pa buloba baswè kulongolola èkèleeziyà leelù ewu. Kumulengeja ne byà bukwapànu; kutentula bintu byà pa buloba; bàteeta kupeta bidimba byàbùngi, kubweja cintu kanà cyónso mu bwobùmwe bwàbò. Èkèlekèle! Ncintu cyà cyènzà luse. Bulongolodi kampànda bùteeta kutàmba bukwàbò, kubweja cintu kanà cyónso bu cidimba. Udi mufwanyine kubàbweja mu bulongolodi ebu, kàdi bóbò kabààdyàkubwelakù mu bwobùmwe bwà Kilistò to too ne piikalàbo basukula ne balediibwe cyàkàbìdi ku Nyumà wa Nzambì. Aci ncilelèlè. Mbafwànyine kwikala ne mènà àbò mafùnda mu mukàndà mwaba ewu, kàdi kaayi Muulu mwàmwa nànsha, mu Mukàndà wà Mwoyi wà Mwànà wa mùkòòkò, mu mùshindù wa ne mmafùnda ne Mashi à Mukalenge Yesù to.

¹⁶⁰ Bakàji bônso, bààkadìlongolola, bwà kumwèkabò balengèle. Nènku, kaa, ndi ndifwànyikijila ne bàvwa bulelèlè menemene ne mmwènekèlu kampànda, pàmwapa bafwàne inàbànza wa kumpàla awu ne bikwàbò. Bàvwa badìlongòlòle bônso bwalu bàvwa ne cyà kamwèka kumpàla kwà mfùmù.

¹⁶¹ Ndi ngèèla meeji ne ke lutàtu menemene kùdi maèkèleeziyà ètù leelù ewu. Bàdi bàteeta kudìlongolola, mùdi bàà pa buloba amu, biikàle ne bisànkàsanka byà pa buloba, ne bintu byà pa buloba mu byòbi amu, bènza bintu bìdi byà pa buloba, bàdisanga ne byà pa buloba, bèèla meeji ne bàdi mwà kutuutakeena ne

Mfùmù. Nzambì kàtu ùcyùka abi to. Ùtu mukìne abi. Kàdi tudi baswè kwenza maalu bu bàà pa buloba.

¹⁶² Yimwè yà ku èkèleeziyà yètù, mmùmvwà mwàmbe, mmyumùshe mikàlu, mibweje balami, ne bikwàbò, mu èkèleeziyà, ne mîngà misangu bampaasàtà, bàdi basèlàngane misangu yinaayi anyi yitaanu, ne—ne bàmwè bàà kùdibo bànwà mfwankà. Bàmba ne: “Nebà—nebacicimùne. Nebààkane.” Kupàtula muntu mu cinwìnù cyà maalà dilòòlò kampànda, kàdi kumutèka mu cyambilu dilòòlò didi dilonda. Mémè nciyàkwitabuuja byà mùshindù awu nànsha. Ndi ngiitabuja ne muntu ùdi ne cyà kujaadikiibwa, ncyà bushùwà, mujaadikiibwe. Ndi nnwàmbila, misangu yàbùngì yitùtù twabiikila. . .

¹⁶³ Ndi ngiitabuuja dibatiiza dyà Nyumà Mwímpè. Ndi ngiitabuuja dyakula dyà mu myakulu, kàdi ndi ngèèla meeji ne tutu twatamba kwela ntèndù pa cyòci aci be. Muntu mulùme ùdi mwà kwakula mu myakulu, ne muntu mukàji wàkula mu myakulu, kàdi piikalà nsòmbelu wa mukàji awu ne nsòmbelu wa mulùme awu kàyì ùfwànangana ne cidi myakulu yùdi wakula ayi to, díbà adi mmwakulu wà mafi, bwalu Nyumà Mwímpè neàkwenzèjè maalu bilondèshile Bible. Neàkufikishe ku cyuwidi cyà cipidi cyà Kilistò.

¹⁶⁴ Nwàngatè muntu udi wakula mu myakulu, ne cijji cikumbàne bwà kulwisha scie wa ku nzembu, ne ùjaana beena mutumba, ne byònsò byà mùshindù awu abi. Mòna’s, udi ubiikila aci ne n’Nyumà Mwímpè anyi? Kacyèna mwà kwikala Nyumà Mwímpè to. To, mukalenge.

¹⁶⁵ Nyumà Mwímpè ùdi bupòle, disànka, ditalala, mwoyi mule, bwímpè, musàngeeleu, lutùùlù, diitabuuja. Nyumà Mwímpè, s’ki mamuma à Nyumà awu, àdi Nyumà Mwímpè ùkwàma mu Èkèleeziyà wa Nzambì udi ne mwoyi, kalolo, ne didipwekesha, didipwekesha, kunangangana muntu ne mukwèndè, mwoyi mule.

¹⁶⁶ Piikale mwanèètù yèyè mutùpàkàne, kanùmukùmi anyi kwenza cingà cintu to. Ndàayi kùdiyè nùmone ne nudikù mwà kumwaluja. Kanwìndidi bwà muyiishi kucyènzayè to. Nwènù cyenzàayi, muntu kampànda mukwàbò. Muyiishi kèna mwà kubyènza byònsò to, nànsha balami kabèèna mwà kubyènza byònsò nànsha. Muntu yònsò, udi cidimba cyà Mubidi wà Kilistò, ùvwa ne cyà kuya kalonda mukwàbò. Tudi ne. . . Nènku twètù biikale Nyumà wa Kilistò munda mwètù. . . Wàkalongesha lusùmwinù lunène. Bààkashiya makumi citèemà ne citèemà, ne kuya kalonda ùmwè awu. Aci’s ke citùdi ne cyà kwenza. Kàdi twètù tudi twamba ne: “Kaa, bàlekèlaayi bàye.” Kabìvwa bìkèngela bwà twètù kwenza nànkù to. Bìvwa bìkèngela bwà twètù kwikala ne kalolo, tufwilàngana luse, mwoyi mule. Ki mamuma àà Nyumà ngwòwò awu.

167 Mpindyewu, tudi tusangana twètù biinè dībà adi, ne Esther, paanyimà pàà yéyè. . . Bàakamutèka mu ùmwè wà ku myaba eyi, bwà kudìlongololayè, bwà kadìleejayè kumpàlà kwà mfùmù. Ekèlekèlè! Yéyè wàkacibènga. Kàvwa muciswe to. Wàkaswà bwà kupàtuka ànu mùshindù ùvwàye awu. Amen.

168 Leelù ewu tudi ne èkèleeziyà yidì miswè kwenza maalu bu bàà pa buloba, anyi bwalu twàdyundù. Nzambì mwàmbè ne: “Musangu kampànda pàvwàye mukesè ùvwa ùMusadila. Kàdi pààkadyundàye, dībà adi e kuMupwàye mwoyi.” Ncyà bushùwà.

169 Patùvwà ne lwesu lwà cyamù kwinshì eku mu njila mwaba kampànda, ne ngoma wa mutumbi, twenda tumwimba ne nyimà yètù yà byanza; ne cindaalà cyà kalè, tucimba; biikalè twenza masangisha à mu mùsèèsù, s’nuvwa ne didipwekesha. Kàdi pàtwàlu kufika ku dipeta nzùbu yà mìliyô yisàtù anyi yinaayi, ne bintu binène ne byalàbàle byà mùshindù awu, dībà adi twètù e kulwa ne dyambu dyà oyì-olèlè mu mùshindù wà ne twacìpu too ne mwoyi, ncyà bushùwà, kudìvwija bàà kapelu pàmwè ne buloba.

170 Mvwa nsanganyibwa mu mwaba kampànda dīngà ditùkù mùvwà, mwanèètù wa beena cijila, kùvwa musùmbà wà bantu bàmwenzela mudimu. Kàdi mukàji yònsò uvwa upàtukamù mu dībà dyà kàfè, bwà kwikisha kunwà kàfè, mukàji yònsò muntwamu ùvwa ne nsukì mīpì ne mulaabe kàpèntà ku mishikù. Mpindyewu, wèwè udi wamba ne: “Mwanèètù Branham, abu ki mbwalu bwèbè bwà kwamba aci to.” Mbwalu bwànyì. Bible ngudi wamba nàнку. Ncyà bushùwà.

171 Bakàji bààbùngì bàà beena Mpenta bàdi bàlwàta bilàmbà byà bantu balùme, kàdi Nzambì mmwambè ne ncinyangu ku mesù Kwèndè. Ncyà bushùwà. Mmunyi mùdì utèkemena bwà kuya mu Dyulu mùshindù awu’s? Bìdi bileeja ne Nyumà Mwîmpè kèna munda amu to. Bu byòbì ne Nyumà Mwîmpè ùvwa munda amu, ùvwa mufwànyine kukupìisha. Cyà bushùwà. Kaa, udi mufwànyine kwela mbilà, kwakula mu myakulu, kubànda kupweka, kujà maja mu nyumà. Nkààdiku mumòne ba-Hindous bènza cyòci aci, ne ba-Indiens, ne bintu bikwàbò byònsò ebi. Aci kaciyèna cyùmvwija cintu nànsha cìmwè to, ambà ànu ne kùdi nsòmbelu kampànda udi mwà kutwà cyùdi wamba aci nyama ku mikolò, bukolè bwà Nyumà Mwîmpè, bwà kufikisha bantu ku diikala ne nsòmelu wa difwàna dyà Nzambì. Ki Mukàji-musèla wa Kilistò nyèye awu.

172 Esther ùvwa ne cyà kulwa mukàji-musèla, pa nàнку kàvwa muswè nànsha cìmwè cyà ku bilengejilu byà bàà pa buloba abi nànsha. ùvwa muswè kubwela, kùdi mfùmù, ànu mùvwàye amu. Wàkadìlengeja mùvwà bakàji bàà beena Mpenta ne cyà kwenza amu, ne nyumà mupwekèlè wa kalolo. Nènku pààkapità bakàji bàà mfùmù bàà bintu byà bituuta kwìsù abu, ne bintu byàbò byònsò byà maja à cyena leelù abi, mfùmù

kubàtàngila, e kubàteeka mu cibambalu ne bakàji babanjija. Kàdi pàakamwèkà Esther ewu ku mèsù kwèndè, ke kumónayè nyumà, mupòle, mupwekèle wa kalolo awu, ki kwambayè ne: “Ki yéyè awu. Ndàayi nukangàtè cifulu cyà butùmbi nùmwàsèci ku mutù.” Ki mùdì bwalu nàнку.

¹⁷³ Bádilengeje ne nyumà wa mùshindù awu, kî ng’ànù bakàji nkààyàbu nànsha, kàdi ne balùme, pààbò, bádilengeje ne nyumà wa mùshindù awu. Dìbà adi nudi nwenda nudilongolola bwà—Mukàji—musèla, mupòle, wa kaneemu. Esther wàkakezula mwoyi wèndè.

¹⁷⁴ Kùdi byàbúngi bitùdì tukòweleela, byà pambèlù ebi, kaa, kùdi ne cyà kwikala byumushi byà minyèngù byàbúngi, ne byàbúngi byà mùshindù ewu, bwà—bwà kubilonda.

¹⁷⁵ Mùneemu emu cikondo kampànda, mwawa mwimàne mu—mu nzùbu wa dibandila mpingù ne bimfwànyì mu Tennessee. Mémè kupicila mu kaaba kampànda, ne bàvwa bàleeja disùnsula dyà bìdì byenza mubidi wà muntu. Mbámbe ne muntu wètù wa kilo 68 ewu, bintu bìdì byenza mubidi wèndè bìvwa bìyiila meeyà makumi mwandamukùlù ne ànaayi. Mpindyewu, wèwè’s udi muntu kampànda àmba’s, kî mmwòmò to, ne meeyà makumi mwandamukùlù ne ànaayi? Kàdi bakàji bakwàbò, bakàji bàà beena Mpenta, nebàlwate nkooci wa cisèbà cyà kasengela nshimbà wa ndola nkàmà yìtaanù, kàdi kwela mutù muulu, bu mvùla mwà kulòka, mufwànyine kubinyija, biinè abu kabàyi mwà kuyiila nànsha meeyà makumi mwandamukùlù ne anaayi to, ncyà bushùwà, bwà bintu bìdì byènta mubidi wà muntu. Ki bulelèlè mbwòbù abu, kî mbilèlè to. Ki bulelèlè mbwòbù abu. Meeyà makumi mwandamukùlù ne anaayi, cyenza bu ndambù wa lupèmbà lwà kumyamina mu ciswa cyà nzòòlo, ne ndambù wa kàlùsiyumù ne bikwàbò. Meeyà makumi mwandamukùlù ne ànaayi, nudi nutàbaleela cyòci aci ne ntèma mikolè.

¹⁷⁶ Uya mu nzùbu wa cidilu kàdi usanganamù... ulòmbesha dilòngà dyà nsupù kàdi ntànda mufwànyine kwikalamù, s’udi mufwànyine kufùnda nzùbu wa cidilu awu ku tubàdi.

¹⁷⁷ Kàdi neùlekèle dyabùlù ùkuswikila tèlèvisiyò yà kalè mikooyike ayi ne bintu byà twarta mu nshingù mwèbè amu, ne ùbiitàbuuja; ùkuvwàdikisha bilàmbà byà kale byà bukooyà, bakàji aba, tunkanzu tukesè twà kale twà tundamàtà tùdì twenze bu kaasaucisse kalamuna dikòbà, kàdi kupatuka pambèlù apa mu mùsèèsù mùshindù awu. Kàdi udi mumanyè’s, mwanèètù wa bakàji, ncyèna ngèèla bilèlè pàndì ngàmba apa to. Nudi bangùmve bibì.

¹⁷⁸ Teèlejàayi. Ndi ngàmba eci. Udi wenza maalu mùshindù awu, kàdi ku Ditùkù dyà Cilumbulwidi neùbadiibwè bu ngèndààmàsàndì. Cyà bushùwà. Yesù wàkamba ne: “Ewu yònsò udi utàngila mukàji bwà kumwalakana mmwendè nendè masandi munda mwà mwoyi wèndè.” Nènku pàakèngelabi ne

ngènzàmpèkààtù awu àkalumbùlùlè bwà dyenda dyà masandi, cibangu wa nsamba nganyi? Ngwèwè. Udi mubùkebe nganyi? Ngwèwè. Ncyà bushùwà. Pawikalè mukadyanyike pambèlù pààpa, bwà kumwèka kumpàla kwà balùme, bwà kwikala bu bàà pa buloba ne kuvwàla bu bàà pa buloba.

¹⁷⁹ Mémè kwamba cyôci aci musangu kampànda, ke mukàji kampànda, mu Louisville, mu Kentucky mwàmwa, kwambayè ne: “Èè, tèèlejààku kùnweku, Mukalenge Branham. Nenkufikishe ku dyumvwa ànu mpindyewu!”

Mémè ne: “Èyowà’s, màndamù?”

Yèyè ne: “Aci’s ke mùshindù ùmwèpelè wà nkanzu ùdìbo batelè.”

Mémè ne: “Bàdi bènza màshinyi à bilàmbà ne bàpàànyisha bilàmbà bijimà.”

¹⁸⁰ Mbwalu wèwè udi muswè kuvwàla nàнку. Kùdi cintu cipampàlà mùke munda mwèbè. Ncyà bushùwà menemene. Udi wenza cintu aci kî ne mbwalu mmodèle to. Udi ucyènza kî ne mbwalu udi ne cyà kucyènza to. Udi ucyènza bwalu udi muciswe.

¹⁸¹ Udi unwà mfwankà bwalu udi muswè kunwà. Kwèna mwenzèjiibwe bwà kumunwà nànsha. Ndi ngèèla meeji ne cintu cibyacibyàlè cinkààdiku mumòne cívwa mmukàji wènda mu mùsèèsù, bu munùdi numòna muntu yònsò emu, mu màshinyi, ne mfwankà ayi mipàyika pankaci pàà minu yèndè. Mòna’s, mbundù. Aci’s nkwaka mutàmba bunène wa balwishì utùdi nendè mu ditùnga emu, piinè apu mpàdi bangàngàbukà ne bamanyi bàà maalu à mamanya bàmba ne mfwankà mmùle tèntè ne kansèrè ne bintu bikwàbò byònsò. Kàdi bàdi ànu munkaci mwà kuyipwita, dìbà dyònsò.

¹⁸² Kumòna mwànà mukàji, udi ne cyà kwikala mwena Kilstò awu, mudyòlòle ku mwelelu wà màyi aku, wòwa màyi ne bânà balùme ne bânà bakàji pàmwè, muvwàle kàpùtulu kàà mwînshì kàà dyowa naakù màyi, mudyòlòle mwaba awu. Ndi ne bânà bàà bakàji bàbìdi. Ncyèna ngàmba ne kî mbafwànyine kwenza aci to. Bàdi bàmba ne bàdi bwòta munya bwà kukúnza. Nebwòtè munyà wà mwànà bwà kukúnzabò bwà mémè ànu mucìikàle ne mwoyi. Necìikalè mwànà wa *nunku*. Nwamònu anyi? Necìikalè mwànà wa Mukalenge Branham, mwikàle ne dibaya *mòna* bule. Mémè ndi ngiitabuja ne abi mbibi.

¹⁸³ Dìbà adi tudi tudìbìikila twètù biinè ne: “Kaa, twètù’s tudi cidimba cyà èkèleeziyà wa Mpenta.” Kaa, bundù bwèbè! Cyà bushùwà’s. Èkèleeziyà wa Mpenta ùdi dìjinga ne dikezudiibwa, mwaba wònsò ewu kuumukila kumpàla too ne paanyimà, ne kuumukila mu nzùbu wa mwînshì mwà buloba ne lwà panshi, ne ku cisàsà. Ncyà bushùwà. Nànsha nàнку, mu byònsò ebi, ke udi mutambe bwimpè utùdi nende. Kàdi ùdi mwà. . .

184 Ànu bu mu cikondo cyà mvità yà dishintuluka ne mu cikondo cyà Jeanne d'Arc, France ùvwa dijinga ne dishintuluka, dîbà adi bàdi dijinga ne dikàndàmeena dyà dishintuluka bwà koolola bîmwè byà ku bintu bîvwàbo bàbîndulukila.

185 Kàdi èkèleeziyà wa beena Mpenta ùdi dijinga ne dishintuluka. Mmwômò. Ncyà bushùwà menemene. Dibîndulukila bintu byà bibì, ne kwitaba bintu bìdì bîmpè, amen, dibàtiiza dipyadìpyà dyà Nyumà Mwîmpè: “Bwà Èkèleeziyà kuDìlongololayè!”

186 Vùlukàayi ne, kacyàkwikalakù. . . Kwèna mwà kwamba ne: “Èè, mpindyewu, ndi wa mu *cikampànda*, beena Assemblées. Ndi wa mu Foursquare, anyi Église de Dieu, anyi Dîná dyà Yesù,” anyi—anyi ònsò wa ku yôyi ayi awu. To! Kwèna mwà kubwelela nànsha mu umwe wa ku yôyi ayi to.

187 Nzambi ùdi ùkubîkila bu muntu-nkàaya. Nènku ngwèwè udi ukèngela bwà wèwè kuditòkeshà, bwalu: “Yèyè ùdi wàngata bantu bàà mu Bisàmbà byà bendè, bwà bwalu bwà Dîná Dyèndè, Mukàji-musèla Wendè, bantu bàà Bisàmbà byà bendè.”

188 Esther wàkadikezula. Wàkakezula mwoyi wèndè. Ki cyàkakezulàye. Ki cìdì èkèleeziyà naaci dijinga: dikezula dyà mwoyi.

“Mmunyi mùdi ukezùke mwoyi wèbè, Mwanèètù Branham?”

189 “Musukula ku màyi à Dîyi,’ ku Mashi à Yesù Kìlistò.”

190 Bible mmwambè ne mbibì bwà bakàji kwenzabò maalu mùshindù awu, ne bwà balùme kubàlekelabo bènza nànkù. S’nwènù bàà nseka yònsò ibìdì. Mulùme udi ulekela mukàjèndè ùpàtuka mu mùsèèsù butaka, mwikàle muvwàle bilàmbà byà mùshindù awu, ndi ne kaneemu kakesè bwèndè yèyè bu mulùme. Yèyè nkameta-madimbu. Ncyà bushùwà. Mukàji awu ùdi umwangata bu dînyùkà dyà màlòngò. Bundù bwènù. Bìvwa bìkèngela nwènù kwikala balùmè.

191 Ne mpaasàtà wàlekela èkèleeziyà wèndè wènza bintu byà mùshindù ewu, kàyi ùbìtaayishila ku cyambilu to. Yèyè ncilùme-cikàji. Batùdi naabò dijinga mbànà balùme, Èvànjeeliyò, bàdi kabàyi bavwàle bindundu ku byanza to, kàdi ne bukòlè ne dilleja patòòke dyà Nyumà Mwîmpè, ne Dîyi. Bible ùdi wàmba ne bintu ebi mbibì. Mbibì bwà bantu kwenza maalu mùshindù awu, bwà kwenza byenzi byà mùshindù awu. Bìvwa ne cyà kuyiishibwa, ne kutèekiibwa mu cyenzi, ne mu myaba yònsò. Anyi, èkèleeziyà ùdi dijinga ne dyediibwa dyà kapùngù, dikezudiibwa kupàtula bìvwà munda.

192 Esther wàkapàtula bìvwà mu mwoyi wèndè kumpàla kwà Nzambi, wàkenda ne nyumà mupòle ne mupwekèle; Èkèleeziyà wìkala Mukàji-musèla wa Kìlistò. Mpindyewu, vùlukàayi ne, Esther wàkabènga didilengeja dyà bukwapanu. Wàkangata

Nyumà munda mwà mwoyi wèndè, bwà kuya kumpàlà kwà mfùmù.

¹⁹³ Kàdi mukàji leelù ewu, èkèleeziyà udi wela meeji ne neàbwele bwalu ùdi ne bidimba bipite búngì, ùdi ne musùmbà ùdi mulwàte bîmpè menemene kutàmba bônso, ùdi ne bulongolodi butàmbe bunène, èkèleeziyà mutàmbe bunène wa mu cimenga, ne bintu byà mùshindù awu, nenùcipangile mu ntàntà wa mùliyò wà kilòmèètà panwikale nweyemena cyòci aci.

¹⁹⁴ Cintu's n'nyumà mupòle, wa kalolo, wa kaneemu ku Dìyì dyà Nzambi: “musukula ku màyi à Dìyì,” ne Dìyì munda mwèbè. Ndisukula. Amen. Èkèleeziyà ùdi dijinga ne disukudiibwa, disukudiibwa dyà Èvànjeeliyò mu kaabujimà. Ncyà bushùwà. Kì ndisukudiibwa dyà citùpà to, kàdi disukudiibwa dyà Èvànjeeliyò mu kaabujimà, bakezula ne: “bavwijìbwe bifùkiibwà bipyabìpyà mu Kilistò Yesù.”

¹⁹⁵ Mukàji-musèla wa Yesù kî mmukàji-musèla wa manyaanu to. Kàvwa mufwànyine kwikala ne Wendè Mukàji-musèla, wa bukooyà to.

¹⁹⁶ Pàdi mukàji ùfika mu cikondo cyà kusèdiibwayè, kàdi mwikàle ùmwèka bu udi upàtukila mu cikumbi cyà ngulube mwàmwa; mulùme udiku udyùmwa ne buneeme, kî mmufwànyine kumusèla to. Neànji kumufikisha ku didikezula kezùkezù.

¹⁹⁷ Nènku pàdi èkèleeziyà wa Kilistò ùlwa bwà kubwela mu dibàkà, wèla meeji ne ùdi ùbwela mu Mukàji-musèla, ne bimanyinu byònsò byà maalu à pa buloba pambidi pèndè, Mukàji-musèla wa Kilistò kadyàkwikala nànkù nànsha. To, mukalenge.

Ndi ne cyà kulwijakaja.

¹⁹⁸ Nànsha Èkèleeziyà wa Kilistò, wa Mukalenge Yesù Kilistò, awu Èkèleeziyà kî ng'Èkèleeziyà muvwàle mbondya to, anyi, ne mbondya misùnsùke yà màngumba to. Kènà ne cyà kwikala cidimba cyà dینگumba kampànda dinène to. Ùdi ne cyà kwikala musukula mu Mashì, musùmba ku Mashì. Kàyì wa wàmba ne tudi bàà ku èkèleeziyà mutàmbe bunène, bulongolodi butàmbe bunène, anyi *cikampànda*, *cikansanga*, anyi *cikankènga* to. Bikèngela ikalè mukezùke, mujidìibwe, wa cijila, kàyì katoba anyi mufudì to, ku Mashì à musùngidi wèndè—wèndè, Yesù Kilistò.

¹⁹⁹ Bu Esther, Muntu musokòme wa mu mwoyi, Muntu musokòme, bupòle ne kalolo byà Nyumà wa Nzambi, mu mwoyi wà buntu; kaciyì butumbi ne cipidì cyà bàà pa buloba to.

²⁰⁰ Ntu ngàmbamba misangu yònsò ne maalu à pa buloba àdi àbàlakana; Èvànjeeliyò ùdi wèla nsèsè. Kaa, ncitápùluke ntàntà wa kilòmèètà mùliyò mujimà. Hollywood ùdi ùbàlakana;

Èkèleeziyà wa Kilistò ùdi wèla nsèsè yà dinanga, ne minefùke, ne yà kalolo, yà musàngèelu. Ncyà bushùwà.

201 Esther kàakaswà bwà kudilengeja ne bivwàlù byònsò byà cyena leelù byà bàà pa buloba nànsa. Aci kacivwa cifwànyine kumweka bu mukàji wa mfùmù nànsa.

202 Nènku twètù, bàdi bàjinga kufwànangana ne bàà pa buloba, kàdi tudikù mwà kumwèka bu Mukàji wa Muntu wa Cijila anyi? Twètù, bu Èkèleeziyà wa Nzambì udi ne mwoyi, badilengeje ne bintu byà pa buloba, kàdi pashiishe kumwèka bu Mukàji wa Muntu wa Cijila anyi? Aci ncifwànyine kumwèka cyà cifùkulu anyi?

203 Nwènù bamòne muntu mulùme leelù ewu, udi ne cyà kwikala muntu wa cijila; kàdi ki mukàjèndè ulwàlwà ewu, bu mukàji wa mfùmù wa ditùnga, ne cimwè cyà ku bisùba byà nsukì binène abi mùshindù *ewu*; ne bintu bikünze elu luseke, ne bintu byà màyi à matàmbà ku lukwàbò luseke, ne—ne ùmwèka bu ne bàvwa bamutuutè bùlosò bwà mpencì ku mishiku; ne byònsò byà mùshindù awu abi, wènda ùpwèka ne mùsèsèsù, muvwàle tulàmbà tukesè tumulamàte bu kasèbà kàà saucisse mùshindù awu; ne tulundu twà bisàbatà *mòna* bule, wènda ùdinyènguvula mu mùsèsèsù; kàdi wamba ne: “Awu’s ke mukàji wa muntu wa cijila’s”? Ncyèna ngèela minèkù to. Ndi ngàmba ànu maalu mu wòwò.

204 Ndi mufikè ku ùmwè wà ku nkwaka yètù minène yà cyena Mpenta, ànu àbìdi àdi mashààle aa. Mvwa mwàse ntentà. Ki mpaasàtà kungambilayè, wàmba ne: “Mukàjàànyì mmwimbi wa cisanjì cyà orgue.”

Mèmè ne: “Abi mbìmpè, mwanèètù.”

“Bìdi bikutàcisha bu yèyè mwà kwimba cisanjì anyi?”

Mèmè ne: “To. To, mukalenge. Ncyà bushùwà ne kabyèna bintàcisha to.”

205 Ki kuyaye kùvwa mulongolodi wa ndongamu. Mulongolodi wa ndongamu kwambayè, Mwanèètù Baxter, kwambayè ne: “Abi’s mbìmpè.”

206 Yèyè ne: “Mwanèètù Branham, lwílà kuneeku. Ndi muswè bwà wèwè kutwilangana ne mukàjàànyì.” Ki mèmè kuya kuntwaku.

207 Bu nwènù mwà kuswà mfwilaayiku luse. Nwamònu anyi? Ncyèna nteeta bwà, kutwambila—díyì dyà kadyuwu to. Ndi nteeta kwamba díyì kampànda. Nwamònu anyi?

208 Nènku mukàji awu ùvwa ne yìmwè yà ku yinè yà ku byanza eyi. Ncyèna mumanyè to. Cintakanyi aci, nudi bamanyè’s, byònsò bimana kulongolola, ne kacya ncitukù mwanji kumòna cyà mùshindù awu kacya bandela to; ne nkanzu uvwa mupweka too ne *apa*, kàyì ne cyà paanyimà to, kàyì ne cyà mwinsì nànsa. Nènku ncì—ncitukù mwanji kumòna cintu cyà mùshindù awu

kacya bândela to. Kàbidì ùwà ne tukànu tunène twà ku maci tulembèlèle kwinshì mùshindù ewu, ne bintakanyi búngi cyanààna pambidi.

²⁰⁹ Ki mêmè kukènzakana. Mêmè kudyàmbidila ne: “Kaa, mêmè wabù!” Mêmè ewu’s ndi Baptiste, kàdi ndi mumanyè bîmpè kutàmba aci. Mêmè kutàngila cyàkàbidì. Mêmè kwamba . . .

²¹⁰ Mpindyewu, bu nwênù bwà kuswà, eci ki mbilèlè to. Kàdi byàkakèngela bwà mêmè kucyàmbila mwanèètù wa balùme, ne ndi ntèkemenà ne cyàkamwambulwisha. Ncyèna ncyàmba bwà kwikala mushiilàngàne to; bu byôbì nanku, mvwa mwena lubombo, nwamònu’s, bìvwa bikèngela kwikala mukezùdiibwe, mêmè mwinè.

Mêmè kwamba ne: “Mukalenge, udi mwambè ne mukàjèèbè awu ùwà munsantu anyi?”

Yèyè ne: “Kaa, èyowà’s.”

²¹¹ Mêmè ne: “Ùdi ùmwèka bu ne kî mmunsantu to, bwànyì mêmè.” Mêmè ne: “Nci—ncitu mwanji kumòna cyà nàнку awu aci kacya bandela, ne mmukàji wa mwamba to. Aci kacyèna cìmwèka bu mukàji wa muntu wa cijila to.”

²¹² Nànsha mene èkèleeziyà wa Nzambì udi ne mwoyi, udi mweyèmene ngenzèlù yèndè, fêtes yèndè yà dinwà dyà cyâyi, fêtes yà ditwà dyà mubèlè, manayi à twartà, ne maja, ne bintu byà nsòmbelu mulenga abi, ùdìlengeja yèyè mwine mùshindù awu, ne maalu à pa buloba, ùmwèka bu Mukàji-musèla wa Nzambì wa Cijila. Pàdiye ùwà mfwankà, ne ùja maja, ne fêtes, ne didyà dyà bàpwita nsupù, ne dinwà dyà cicyampa, ne byònsò byà mùshindù awu, cikòlà bàmba mùdìbo Mukàji-musèla wa Kilistò? Kabèèna bàmwèka bu Mukàji wa Muntu wa Cijila to, bwànyì mêmè. To, mukalenge. Yèyè kî mmufwànyine kusungula cintu bu nàнку to. Mmufwànyine kwangata mukàji kampànda uvwa mujaalàme, ùmwèka bu civwàYe ùteeta kudifwànyìkijila aci. Ndi ngèèla meeji ne aci ncilelèlè. Aci ncifwànyine kutàpa ku mwoyi ndambù.

²¹³ Maamù wànyì mununu wa ku Sud ùkaadi mufwè. Pancivwà mwànà wa nsongàalùme, tuvwa ne ciibidilu cyà kwikala ne. . . Katùvwa nànsha ne cintu cyà kudyà, cyà nsongu to, ne tuvwa ne tukunde twà cibààlàbààlà ne dyàmpà dyà bukula bwà nsèke. Ncyèna mumanye ní nudi babimanyè anyi to. Pa nàнку katùvwa ne. . . Mukàji neebè kàvwa ne màfutà to munda mwà cidimu cijimà, nènku tuvwa ne cyà kwangata lwesu lwà kale lunène lwà mùshindù *kampànda*, kàdi kwelamù bisèbà byà minyiinyi. Tuvwa mwà kuya mwaba ùvwàbo bàsaaya, anyi mwàba ùvwà basaayi bàà nyama bafwànyine kuumusha minyiinyi kàdi kutùpèèsha cisèba. Nènku tuvwa tucyèngulula, bwà kupeta màfutà, ne kuàpongolwela mwaba awu.

²¹⁴ Disambòmbò dyònsò dilòlò, mààmù ùwà wàmba ne bìvwa bitùkèngela kunwà ndambù wa màfutà à mùdyàntondo. Kàdi

mémè—mémè ncyènakù mwà kutwàla cintàkanyì aci nànsha too ne leelu ewu to. Kàdi bìvwà bikèngela ànu bwà mémè kuànwa. Mvwa mwà kulwa kùdìye, mudikwàte ku dyulu mùshindù *ewu*. Mvwa mufwànyìne kwamba ne: “Maman, ncyèna—ncyèna ànu mwà kuànwa to.” Mémè ne: “Adi ànsaamisha bikolè.”

Yèye ne: “Wòwò kaàyi makusaamishe to, kaèna mwà kukukwàcisha to.”

215 Pa nàнку ndi ngèèla meeji ne ke mùshindù ùdì diyiiisha dyà Evànjeeliyò nàнку. Dyòdì kàdìyi dinùvundùlùle ndambù to, difikishe cyèbè. . . dyùmvwija cìfù cyèbè cyà nyumà bìmpè, dikusaamisha ndambù, bwà wèwè kudìkenketa nkààyebè ne Bible: bwà kumòna ne cilunji cyà kale aci, ne citù, dipanga kuneemeka dyà Nzambi adi, dinanga dyà maalu à pa buloba, tèlèvisiyò, ne bintu byà ciibufùku; kàdi kushiya èkèleeziyà munda mutupù, ne bibàsà byà mu èkèleeziyà munda mutupù. Piine apu, mpàdibi bikèngela bwà wèwè kupàtuka pambèlù mùshindù awu bu Yesù, udi ne Nyumà Wendè munda mwèbè, ùteeta bwà kufikisha bantu bònso bàà mu ditùnga bwà kulwa ku èkèleeziyà wenù, bwà kwakidila Kilistò. Kàdi twètù kudibiikila dîbà adi mutùdì Mukàji-musèla wa Kilistò? Kaa, luse kaayi’s wè, mulunda wànyi!

216 Dîbà ndimanè kulwa. “Mukàj’Èndè-musèla mMumanè kuDilongolola.” Kaa! “MuDilongòlòle nkààyendè.” Mmutèke bintu byònsò ebi ku luseke. Vùlukàayi ne, Esther wàkasungudiibwa, kàdi bakwàbò bààkabèngiibwa. Nènku ànu aba bàdì balediibwe cyàkàbìdì, bàdì ne Nyumà wa Nzambi abu, ke biikalà Basungula Ditùkù adi, biikalà cifulu cyà butùmbi ne cyà kwashiibwa ku mutù Kwèndè. Kàdi bakwàbò nebàbèngiibwè.

217 Lekèlaayi nwambilè kantu kakesè kàkenzeka. Mémè—mémè, ndi mpàndànjlà, bu munùdì bamanyè, ngèza mudimu wà butangadiki, wà bu mpàndànjlà, muyè dyàmwàmwà dyà mbù misangu mitwè ku mwandamutekète, munyùngùlùke buloba. Muneemu emu, àbìdì àdì panshi aa, mu cimenga cyà Loomò, Loomò ncimenga cinène bwà maalu à disonga dyà mpingù. Nènku bàvwa ne kàlaasà kàà disonga dyà mpingù mutwamu, ne bààbùngì bàà ku bansòngà bèètù bàà cyena Àmèrikè bàsòmbela bàyà kuntwaku cidimu cyònsò, bwà kwenza cidimu cimwè anyì bìbìdì bwà kulonga kwà disonga dyà mpingù, bwà kuyiila bwà kuzòla bimfwànyì. Kùvwa musùmbà wà bansòngà bàà cyena Àmèrikè, balwè muntwemu, kùkaadi ndambù wa bidimu, mùvwàbò bandondèlè bwalu abu. Kàdi dîbà dyàkafikàbò muntwamu, bóbò kàdi e kutomboka ànu bu mùdì ngulube yà diitu’s. Pàdìbo mu Loomò, bàdì bènza mùdì beena Loomò bènza: bàpàtuka bàkanwà maalà, bàdìvuula bilàmbà, ne bintu byònsò, bènza maalu à lukutukutu, bònso ne bânà bàà balùme ne bânà bàà bakàji.

218 Kàdi kùvwa cilongelu kampànda. Nènku mu cyôci cilongelu eci, ewu—ewu musumbà wà bansongà bàà cyena Àmèrikè kulwawù kuntwakù. Nènku yònsò wa kùdìbo, pàmwe ne bònsò, kwenzabo cintu cimwècimwè aci. Kàdi mwànà wa bakàjì mutekète kampànda, kàvwa yèyè wányisha abi to, nànsha byà kumòna lufù. Ùvwa ùshààla mu nzùbu. Mu mèbà à bufùkù, ùvwa ùbala pàvwàbo bònsò bapàtùkè bakanwè maalà. Mundaamunya, ùvwa wènza mudimu, ùlonga. Èè, ùvwa wa bèèlùlwila kùdì cilongelu cijimà aci. Kàdi yèyè ùvwa mudilamè bu inàbànza, ùditwàla bu inàbànza. Nànsha mwinè mùvwàku bansongà bàà cyena Loomò amu ne bintu byònsò mu nyùngùlwilu amu, bàteeta bwà kumufikisha ku dipàtuka, wàkabèngà aci. To, mukalenge. Wàkashàala yèyè ànu ne màlesònà èndè, uyilà mwà kuzòla, ne kulaaba mùkubù's, èyowà's wè. Nènku wàkashàala ne cyôci aci.

219 Ndekeelu wa byònsò, nsentedi mununu wà muntu amu ùvwa munkaci mwà dimujooja, pa kumòna ne yèyè ùvwa mutàmbe kushìlangana bikolè, nànsha mwinè mùvwàye mwena Kàtòlikè kàà cyena Loomò amu, ùvwa ànu munkaci mwà kumujoja, mùshindù ùvwàye ùditwàla. Dilòlò kampànda, mwànà wa bakàjì mutekète ewu, mu lupangu mùvwà kaa—kaastudio aku kàsanganyibwa, mòna's, anyì mwaba ùvwàbo ne cilongelu aci, e kupàtùkayè mu lupangu lwà cilongelu aci, e kuyaye mubànde ku lusongo lwà kakùnà, ne dībà dikaavwa dilumba kubwela. Nènku ùvwa mwimane kuulu aku, ne kwìsù kwèndè kulenga, kukezùke, ne nsuki yèndè milembèlèlè, mutàngile dyàmwàmwa *lwà* kùvwà dībà dikabwelela aku.

220 Nsentedi mununu ùvwa munkaci mwà kukòmba mu bulà amu. E kushàalayè mujooje mwànà wa bakàjì awu, pàvwàye wèndà ùkòmba apu. Cintu kampànda kutùngunukaci ànu ne kumwabila ne: “Nda, kayukilè nendè.” Pa nànu kutèekayè lukòmbò lwèndè panshì, e kutùlaye cifulu cyèndè cilembèle cyà kale aci, e kuyayè mutàngile kùvwà inàbànza wa citende awu usanganyibwa. Kutàpayè kakoso. Ke nsongàkàjì awu kukùdimukayè. Nsentedi kwambayè ne: “Mfwilèku luse, nsongàkàjì.”

Yèyè ne: “Èyowà's, mukalenge. Kakwèna bwalu to.”

221 Ki kujandulayè ne nsongàkàjì awu ùvwa ùdila mwadi. Bakwàbò bònsò bàvwa bapàtùke bakanwè maalà butùku bujimà abu. Ki kwambayè ne: “Màdamù, ndi ntèkemena ne udi ungunvwa mu mùshindù mwimpè, bu mündi ànu muswè kwakulaku neebè.” Yèyè ne: “Nudi muneemu, bidimu bitwè ku bibidì mpindyewu. Nènku ndi mubàngidile musumbà ùnùdì balwe naawù, bòbò nkacya bàadìbwinka ànu mu diya mu mafète, ne bàdi bàlwa kubwela misangu yònsò ànu butùkù, bakwàcike maalà, bilàmbà bikònyina muulu, ne bikwàbò byònsò. Kàdi ndi mumòne ne wèwè kwèna ubwelakana mu mafète à nànu awu nànsha.” Ki yèyè ne: “Ndi—ndi mmòna ne, bidi bimwèka ne, ne wèwè utu misangu yònsò ànu mutàngile

dyàmwàmwà dyà mbú. Ku dilòlò, udi ùbàndà kuneeku, ne wimana mwaba ewu dilòlò dyònsò, ne utàngila mùyaaya dîbà kabwela.” Ki yêyè ne: “Ncinyi, cìdì cìkwenzeja nànkú ncinyi?” Yêyè ne: “Mémè ndi muntu mununu. Nènku ndi—ndi njinga kumanya ne ncinyi cyènza dishiilàngana pankaci pèèbè wèwè ne bakwàbò.”

²²² Yêyè ne: “Èyowà’s, mukalenge.” Yêyè ne: “Mukalenge, ndi ntàngila kwètù kundela pàdì dîbà dikabwela.” Ki yêyè ne: “Dyàmwàmwa adi, dînsambù dyà dîbà dyàdya ki kwètù ku baamwànà.” Ki yêyè ne: “Mu buloba abu mùdi ditùnga kampànda. Ne mu diinè ditùnga kampànda amu mùdi cimenga kampànda. Ne mu ciinè cimenga kampànda amu mùdi nzùbu kampànda. Ne mu mwinè nzùbu amu mùdi nsongààlùmè kampànda.” Yêyè ne: “Yêyè awu, pèndè, mmuzòdi. Pangaàkuumukà, bwà kulwa kuneeku, ngaakadicipa dinanga dyànyì kùdiye. Tudi badìpikè muntu ne mukwèndè.”

²²³ Ki kwambayè ne: “Cìdì ní nganyì yònsò wa kudìbo wenza nànsha ciikàlè cinyi, aci kí ncintàngile nànsha.” Yêyè ne: “Ngàakalaya bwà kwenda ne lulamatu ne mujaalàme.” Kàdi ki yêyè kwamba ne: “Ndi njinga ne mwoyi wànyì mujimà ditùkù dingàdyumwà pa mapwàpwà à ndekè munène awu wansambwisha dyàmwàmwa dyà mbú awu ne kuntùlula mu cipalu cyà ndekè mwàlwàye kutuutakeena naanyì. Ùdi munkaci mwà kungiibakila nzùbu, ne netùsombè nendè pàmwè mu buloba abu.”

²²⁴ Ki kwambayè ne: “Ki bwà cinyi ndi ngènzà maalu mùshindù ùndì ngènzà ewu. Ndi ne lulamatu ku mulayi ùmvwà mwenzèle nsongààlùmè kampànda. Ne yêyè nsongààlùmè ùdi ne lulamatu ku mulayi ùvwàye mungenzèle.” Ki yêyè ne: “Ntu ngàpeta milubù yà kùdiye, ku musangu ne ku musangu, nènku nsòmbelè ngàmufundila, ne” kwambayè ne: “tutu twafundilangana muntu ne mukwèndè. Tucidi ànu kacya twakwàta ku malaya ètù, bindile ditùkù ditwàtuutakeenà.”

²²⁵ Kaa, mwine mùdiku aci mwà kwenzela mwena Kilistò mulelèlà’s, bwà kuumuka ku bintu byà pa buloba. Nènku dîngà ditùkù, wèwè udi wakula bwà kubwela mu cisabù, pa mapwàpwà à Nkuci! Yêyè ùlwalwa bwà Mukàjì-musèla, ewu udi kàyì ukùtakana ne bàà pa buloba anyì bintu byà pa buloba to. Mmwowèshùbwe mu Mashi à Mwànà wa mùkòòkò. Mmucipe Dyèndè—Dyèndè dinanga ànu kùdiYè. Dinanga dyà maalu à pa buloba ndiyè ne ndifwè bwèndè Yêyè. “Dibàkà dyà mwànà wa mùkòòkò ndilwè, ne Mukàjì Wèndè musèla ùkaadi mumanè kudilongolola Yêyè mwinè.”

Twànjàayi kwela meeji pa bwalu ebu patùdì twinyika mitù yètù apa bwà katanci kakesè cyanààna.

²²⁶ Dînga ditùkù, bu mùndì ntàngila kùyaaya dîbà kabwela, mémè pàanyì, kùkaadi bidimu makumi àsàtù ne cimwè,

kungààkenzà mucipù kùdi Ewu ungààkanangà, dinanga dyànyi dyònsò kùdiYe. Ntu misangu yònsò ànu muteete bwà kushààla mutwe makàsà panshì Bwendè Yèyè ne bwà Dìyì Dyèndè, mwaba wònsò ùnyaaya awu. Ndi mumanye ne kùdi bakwàbò bààbúngì bàdi basòmbe mwaba ewu, mùshindù awu, Bindile bwà ditùkù diikala màzuwà à màyi à kale à mu Siyònà ne cyà kulwa mu cisabù, kwambula misùùkà yètù ne katùbweja mu Bwikadi bwà Yèyè Utùdi banange ne ùtwàkacipà dinanga dyètù kùdiYe awu.

227 Kùdi mwà kwikala bàmwè mwab'ewu dilòòlò edi, bàdi kacya kabàyikù banji kwenza mucipù awu to. Kùdi mwà kwikala bakwàbò bàdi bawènze ne bawùshipe. Pawikalà usanganyiibwa mu awu ngiikàdilù dilòòlò edi, mulunda wanyi, bwà cinyi kwenakù mwà kwalukila ne kwenzulula mucipù mupyamùpyà? Ni kùtu muwenze to, wenzaaku. Bwà cinyi kwènakù bwà kulwa ne kuwènzà dilòòlò edi? Kwamba ne: “Mukalenge Yesù, ndi muKunange.”

228 Vùlukàayi ne, panwikalà bamanè kwenza mulayi wènu, kàdi bacikàle ànu nutampakana mu maalù à pa buloba, Yesù kààkwikala ne mukàji-musèla wa mùshindù awu to. Yèyè kaakwikala ne mwena masandi to. Dinanga dyèbè dyònsò didi ne cyà kwikala kùdiYe. Nènku wèwè munange maalù à pa buloba, ngenzèlù yà pa buloba, kutàmba mùdi munanga Nzambi, díbà adi kwènà mwanji kudilongola wèwè mwìnè nànsha.

229 Muntu awu ùdi mwab'ewu dilòòlò edi anyi, patùdi ne mitù yètù miinyika apa, udikù mwà kwela cyanza cyèbè muulu, kwamba ne: “Mwanèètù Branham, nsambidilèku. Ndi muswè bulelèlè kwikala mùshindù awu. Ndi—ndi muswè kwikala citùpà cyà Mukàji-musèla. Kàbìdi ndi mumanyè ne ndi ngenza bintu bìmvwà nciyi ne cyà kwenza nànsha. Nsambidilèku anyi?” Nzambi àkubènèshè, mwanèètù wa bakàji wa ba-Indiens. Nzambi àkubènèshè, mwanèètù wa bakàji. Ne wèwè, mwanèètù wa balùme. Ne wèwè, mwanèètù wa balùme. Kùdiku muntu mukwàbò anyi? Elà cyanza cyèbè muulu, wàmbe ne: “Nsambidilèku, Mwanèètù Branham. Ndi—ndi—ndi—ndi mumanyè ne ncyèna mujaalàme to.”

230 Mpindyewu ikàlà ne meeji matòoke ne wèwè mwìnè. Tàngila paanyimà mu nsòmbelu webè. Udi ne cyà kutàngila paanyimà kumpàla kwà wèwè kutùngunuka. Tàngila cyùvwà. Tàngila civwà nyumà ùvwà nendè mukufikishe ku dyanza. Wèwè kùyì ne. . . Pawikakà wamba ne udi mwena Kilstò, cikòlà mucìikale ànu uditàpakaja mu maalù à pa buloba, mwanèètù wa balùme, mwanèètù wa bakàji, mmunyi mùdi kùyì mwà kwikala mpofo pawikala kùyì umòna ne udi mupìile?

231 Muntu kampàndà ùvwa wàmba ditùkù adi, wàmba ne: “Mwanèètù Branham, bìvwa bìkèngela bwà wèwè kulekelelakù bantu bàpita kapeepa.” Yèyè ne: “Bantu bàdi bàkubìikila ne mupròfeta.”

Mêmè ne: “Mêmè ncyêna muprôfeta to.”

²³² Yèyè ne: “Kàdi’s bantu bàdi bèèla meeji ne wêwè udi muprôfeta. Bivwa bikèngela bwà wêwè kulongesha bakàji aba. Pamutù pàa kubàmbila bwà kwikalabò ne nsuki mile ne bilàmbà byà mùshindù mwîmpè ne bintu byà mùshindù awu, uvwa ne cyà kwikala ubàmbila bwà kupetabò bintu byà nyumà.”

²³³ Mêmè kwamba ne: “Mmunyi mûndi mwà kubalongesha makumi makolè, pàdìbo kabàyi bamanyè nànsha ABC to, kàlaasà kàà bânà banjèlò aku? Kabàyi nànsha ne bupwekèle bwinè bwà kudikezula bóbò biinè, bàdìbiikila ne: ‘Mukàji-musèla wa Kilistò!’” Ncyêna ncyàmba ne ciji to. Ndi ncyàmba mu dinanga dyà difwànà dyà Nzambi.

²³⁴ Ànu bu mungàmbi mu dindà emu, mêmè mukumòne wenda upweka ne musulù mu bwàtù, ne mumòne ne udi ukadituuta mu bisàbasabà, bwàtù abu kabwàkupitamù to, mêmè nkwele mbilà ne nkwele mikunda, ncyèna nteeta bwà kukwenzela bibi to. Ndi mukunange. Bwalu, wêwè kùyi mwitàbe to, mwoyi wèbè newùjiminè.

²³⁵ Kùdikù mukwàbò, udi mwà kwela byanza muulu kumpàlà kwà twètù kusambila anyi? Ndi mukumòne, lwà paanyimà pàapa. Nzambi àkubènèshè, ne wêwè, wêwè. Udi mumanye ne nsòmbelu wèbè ùdi ùleeja ne udi mupiile. Wêwè ùcidi munange maalù à bukwapanù kutàmba Nzambi, dîbà adi kùdi cintu kampànda cibi mwaba kampànda. Ditàngile. Mu bibambalu mwàmwa, ela cwanza muulu, wamba ne: “Nsambidilèku, Mwanètù Branham.” Nzambi àkubènèshè. Nzambi...Ncyà bushùwà. Bulelèlà ndi ngambilamu, ndi—ndi nkacila meeji matòòke.

²³⁶ Ki lutàtù lùdi naalù èkèleeziyà wa beena Mpenta leelù ewu ndwòlò alu. Katùcyèna ne meeji matòòke malelèlà atùvwà naawù pa ciibidilu awu to. Katwèna ne bukìtù bwà—bwà kulwa ne kwamba ne, twitàbi ne tudi bapiile nànsha. Dyabùlù mmukwàte èkèleeziyà mu mùshindù wà ne ùdi ànu munkacì mwà kudìvwànda mu bitoci byà maalù à pa buloba. Kanwènji nànkù to.

²³⁷ Nsòmbelu wèbè mene ùdi ùshindika ne kwènà ne cyùdi wamba ne udi naaci aci nànsha. Dîbà adi bwà cinyi kubènga kucijìkula? “Ewu watonda mpèkaatù wendè neáfwidibwe luse: ewu udi usokoka mpèkaatù wendè kàakutanta nànsha.” Kwèna mwà kumusokoka to. Nzambi mmumanyè byònsò pa bwalu abu. Kàdi wêwè mumòne ne mumanyè ne kwèna ne nsòmbelu mujaalàme to, kàdi bwà cinyi kubènga kumutonda, ne kumwela patòòke ne kumutookesha?

²³⁸ “Mpèkaatù yà bângà bantu yìdi yìbàdyànjidila kumpàla; yà bakwàbò yìbàlonda.” Yànyi mêmè yindyànjidile. Ndekèlaayi ntondè yànyi yònsò ànu mpindyewu ewu. Nzambi àyilongòlole. Ki civwà cikèngelà twètù kwenza ncyòci aci.

239 Kùdi byanza bitwè ku bisambòmbò anyi mwandamukùlù bivwà byediibwe muulu. Ncyà bushùwà ne mbipite too ne apu mu kaèkèleeziyà kakesè aka, dilòlò edi, kaa bantu lukàmà anyi nkàmà yibìdi mwaba ewu, anyi pàmwāpa lukàmà ne makumi àtaanù. Nzambi àkubènèshè, nsongàalùmè. Mpindyewu, Nzambi àkubènèshè, inàbànà. Nzambi àkubènèshè, mwanèètù wa bakàjì. Ncyà bushùwà. Nzambi àkubènèshè, mwanàanyi wa balùme. Abi's mbímpè.

240 [Katùpà kàà mukàbà wà mèyi munda mutupù—Muf.]... - bakàjì bàà cyena mpenta kabàvwa ne ciibidilu cyà kukòsesha nsuki yàbò to, kàdi bàkaadi bàyikosesha leelù ewu. Mbunganyi bìdi bwenzèkè? Kabàvwa ne ciibidilu cyà kudilaaba... kulaaba—kulaaba bilaabu to. Mamwèbè kàvwa ùdilaaba bilaabu to, piikalayè ne ùvwa mwena mpenta. Mbunganyi bìdi bwenzèkè leelù ewu's? Bwalu bàdi munkaci mwà kudivwàndakaja mu maalu à pa buloba. Ne bantu bàà pa buloba mbatùtàngile. Tudi tudyamba mutùdi Èkèleeziyà wa cijila. Mbwalu kaayi ebu? Twètù katwèna tumwèka bu Mukàji-musèla wa Kilstò to. Bwà bìdi bitàngila nwènù balùme bàdi pambèlù pàapa, ncintu cimwècimwè aci. Mwanèètù, bundù bwènù.

241 Taatù wa mu Dyulu, pàndi ntàngila dyàmwàmwà, ne ngèza dibìikila dyà ku cyoshelu mu mshindù wa ne, ntàndisha, nsùnsula, bìdi bimwèka bu byà cikisu. Kàdi munda mwànyì mùdi mumata mashi, pàndi mumanyè ne tudi twenda tuseemena ku ndekeelu. Tuumàtù tukesè etù netùtaayikè, òmwè dyà ku àdi panshi aa. Lufù nelùdituute, ne mvità. Kàdi mmisangu búngì munyi yínkaadiku mubiikidiibwe ku luseke lwàbò, ne kubùumvwa bàmba ne: “Kaa, Mwanèètù Branham, bu mèmè mwà kwikala ànu ne mwà kubangishilula.” Pashiishe, pàcidi aba ne bukolè apa, Mukalenge, bwà kucìlongolola!

242 Ndi nteeta ne mwànyì mwònsò. Nzambi, swàkù bwà Nyumà Mwímpè àcibuululèku kùdi bantu, bwà ne ndi nteeta ànu bwà kubàkwàcisha, kí nkubàtàndisha to. Kàdi, ànu bu mwàkambà Pòlò, wa kale awu's! Nzambi, ncyènà muswè bwà kutàpiibwabò ku mwoyi nànsha, kàdi ndi muswè bwà kubàtapa ndambù ku mwoyi bwà bàáfika ku òmwèna mwaba ùdibo bapiile.

243 Ndi ndòmba bwà Wèwè kwenzaku, dilòlò edi, bwà bantu aba, bàdi beele byanza byàbò muulu, mene ne—ne kaneemu kakùmbàne bwà—bwà kujingulula, kumpàla kwà Nzambi, ne mbapiile, nènku ne mbaswè bwà kwikala bajaalàme. “Kèbaayi, nenùpetè. Kookolaayi, nebànunzùlwilè.” Kàdi nwènù kanùyì bakookòlè nànsha, mmunyi mùnzululàYe? Panùdi kanùyì nukèba to, mmunyi munwàpeta?

244 Swàkù bwà Nyumà Mwímpè, Mukalenge, àfikishe bantu aba ku didilekelela kùdi Nzambi ne kasukì, dilòlò edi. Swàkù bwà Taatù munène wa Mukalenge wetù Yesù Kilstò

àbàjidilè, musùukà, mubidi, ne nyumà, ne kubàbweja mu Mubidi wa Mukalenge Yesù Kilistò. “Bwalu dibàkà dya Mwànà wa mùkòòkò dikaadi pabwîpi, ne Mukaj’Èndè-musèla mmu Dilongölòle.” Éyi Mukalenge, swákù bwà edi diikale dilòlò dya didilongolola, bwalu mààlabà ùdi mwà kwikala ditùkù dya dituutakeenà Nendè. Katwèna bamanyè ne ndìbà kaayi ditwàbiikidiibwà bwà kutuutakeena Nendè to. Enzàku nàнку, Mukalenge.

²⁴⁵ Mpindyewu pàndi nsambila apa, ne nwènù ikàlaayi ne mitù yènù miinyika. Yònsò wa kunùdi udi mwéle cyanza muulu awu, pawikala ne meeji matòòke menemene mu ndòndò ne cyòci aci, kàbìdi mwikàle wambilamù, ne kùyì ne bundù bwà kulekela bantu bàmanya ne wèwè udi mupìile to! Newikale ne cyà kwimana naabò kwàka ku Cilumbulwidi, wèwè mwine. Ne Nzambi mmutèèke ditwishibwa dikumbàne pa wèwè, bwà wèwè kumanya ne udi mupìile.

²⁴⁶ Mwab’ewu kùkaadi cikondo kampànda, mvwa nyiisha cintu kampànda cyà mùshindù awu. Mvwa ngàakula ne inàbànzà mutekète mwimàne paanyimà pàpa. Ùvwa ùmwèka bibi be, mwànà wa mwambi. Ki kutuutakeenayè naanyì pambèlù pàà èkèleeziyà, kàdi e kunsasulujayè! Kwambayè ne: “Wèwè cibùlanganyì nàanyì wè.” Kànà kakesè, kapange maalu, kalaabè kapenta ku mishiku; nsukì mîpi, mibebula. Kwambakù ne: “Byòbì biinè mèmè nkèba muntu wa kungambila biine abi, s’nènkebèku muntu udiku ne lungenyì.” Yèyè ne: “Kashidi kèèbè kùdidingi kubwedi mu cyambilu cyà tatwányì ne kuyiisha cintu bu nàнку to.”

²⁴⁷ Mèmè ne: “Udi uswa kungambila ne, papa webè, muyiishi mwimpè wa meeji matòòke wa ba-Baptistes mùdiye emu, kàdi kàyì muswè bwà kuyiisha ùtândisha cintu aci?”

Kwambakù ne: “Kàvwa mukwangatè ku mudimu bwà wèwè kulwa mwab’ewu to. . .”

Mèmè kwamba ne: “Kì mmungangatè ku mudimu to, nànsha kakesè. Ndi mulwè ku dibìikila.”

Yèyè ne: “Ncyàdyàkukufwìlakù luse to bwà bwalu abu.”

²⁴⁸ Mèmè ne: “Awu mbowà mufwìle mu bwèbè budimi. Mèmè ndi mulondè ànu Èvànjeeliyò.” Bilòngò byà Rose bìvwa bìpeepa mu kapeepèlè kakesè. Mukàji mutekète mulengele.

²⁴⁹ Paanyimà pàà matùkù makesè, bu paanyimà pàà cidimu cijimà pashiishe, mèmè e kupicila mu cimenga aci. Mèmè e kumòna inàbànzà mutekète umweumwe awu ne jipe wèndè mupwekesha mu cimonu, munkaci mwà kunwà mfwankà, wènda ùpweka ne mùsèèsù. Mèmè kudyàmbidila ne: “Awu’s mmukàji, anyì, mwànà wa bakàji wa Mwanèètù *Kansanga*.” Ki memè kusambuluka njila, bwà kumòna ní mvwa mwà kufika kuvwàye aku.

²⁵⁰ Kuntàngilayè, munkaci mwà kunwà mfwankà ewu, ùpàtwila mwìshì mu dyùlù. Mukàji awu kwambayè: “Mwoyi awu, muiyishi,” ne cyakwidi cibi cyà cibùle kaneemu, mùshindù awu.

Mémè ne: “Èè, èè!”

Kwambayè ne: “Kòkakù mucì wànyì wà mfwankà ewu tǔng. Ikàlà mwàna mulùme.”

Mémè ne: “Kwena ùdyùmvwaku bundù wèwè mwinè anyi?”

²⁵¹ Kwelayè cyaanza mu kabuta kèndè, wàmba ne: “Nàнку kwàta mfwankà.”

²⁵² Mémè ne: “Bundù bwèbè. Bundù bwèbè, bwà kupeesha musadidi wa Nzambì mucì wa mfwankà.”

Mukàji awu kwambayè ne: “Nènku pàmwápa udi mwà kunwà maalà à mu mùlàngì wànyì emu.”

Ki mémè kwamba ne: “Bwà luse kwambi nàнку to.”

²⁵³ Mémè e kumutàngìla. Ncìvwa mwà kudikànda bwà kudìla nànsha, bwalu tatwèndè mmuntu mwìmpè. Mémè kumutàngìla. Mémè kudyàmbidìla ne: “Kaa, ekèlekèle! Úvwa wèla meeji ne ùcìvwa ne dìbà bùngì cyaààà.”

²⁵⁴ Ki mémè kubanga kwasa lwendu. Ncìvwa mwà kukanda binsònji kwìsù kwànyì to. Mémè e kuya. Yèyè ne: “Indìlà katùpà.”

Mémè ne: “Èyowà’s, mandamu?”

²⁵⁵ Yèyè kwalukìla. Cìvwa ànu bu bundù bwà kwìkala kuyiikìla nendè mu mùsèèsù, bantu bàpita mwaba awu. Kusemenayè. Kwambayè ne: “Udi mumanyè cìwàkangambìla dilòòlò adi anyi?”

Mémè ne: “Nèncìvùlùke misangu yònsò.”

²⁵⁶ Yèyè ne: “Ndi muswè nkwambìle, muiyishi, wèwè uvwa mubingè.” Yèyè ne: “Ngààkabungamìja Nyumà Mwìmpè musangu wà ndekeelu.” Mpindyewu, bwalu bwàkandeejà mukàji ewu mbwòbò ebu, ne ncyàdyàkubùpwakù mwoyi to, mu matukù ànyì wònsò à mwoyi. Kwambayè ne: “Úvwa munkaci mwà kuyiikìla naanyì dilòòlò adi. Kàdi,” mwàkambaye, “pangààkaMudyombola musangu awu, cìvwa musangu wànyì wà ndekeelu.” Kwambayè ne: “Mwoyi wànyì úvwa mutàmbe kupapa; ncyèna ncyùka Nzambì, èkèleeziyà, anyì ní ncinyì cyònsò nànsha. Ndi ngèèla taatù wanyì milawu, ditukù dyònsò.” Ki kwambayè ne: “Ndi mwà kumòna musùùkà wà maamù wanyì ùlungula mu ifernò, bu cìnkàlangà, kàdi nguseka.” Aci’s nkubungamìja Nyumà Mwìmpè bwà musangu wà ndekeelu. Elààyibi meeji bwà cintu aci.

²⁵⁷ Tùyaayi Kwètù pa mapwapwà à Nkuci. Twìkalààyi Mukàji-musèla. Jukàayi mu nkwasà yènu amu mpindyewu, panwìkalè bapìile. Lwàyi kùneeku. Imànaayi apà ku cyoshelu eku nwamba ne: “Ndi mupìile. Mwanèètù Branham, ndi ne cìiji. Anyì, ndi—

ndi—mwendè lwendu lwà nciyi muneemèke Nzambi nànsha. Ncivwa—ncivwa ne cyà kwenza bintu bìndi mwenzè ebi nànsha. Mwanèètù Branham, nkàadi mwenzè *cikampànda*, *cikansanga*, anyi *cikankènga*. Ndi mupiile bwà mashimi. Ndi mupiile bwà kwiba. Ndi mupiile bwà cintu kampànda. Ncyèna musadile Nzambi mùshindù úmvwà ne cyà kwenza nànsha, nènku ndi mudyumvwe bundù, ne ndi muswè bwà nsòmbelu wanyì àlongolodiibwè. Kwènàku muswè kunsambidila kaaba aka dilòòlò edi anyi, Mwanèètù Branham?” Nèngiikalè ne disànkà dyà kucyèna.

²⁵⁸ Bu Nzambi mwà kwandamuna ku masambila àanyi, bwà kutèeleja bwà babèèdi, mpofo, ne beena ntàtu, ncyà bushùwà ne Yèyè neàtèelejè disambila bwà ngènzàmpèkààtù. Kwènàku mwà kulwa ne kwikala citùpà cyà Mukàjì-musèla dilòòlò edi anyi? Ndi nkubiikila bwà wèwè kulwa.

²⁵⁹ Twasàkidila, mwanèètù wanyi. Ndi nkàcila bukitù bwà mùshindù awu, bwà ùpàtuka witaba ne udi mupiile. Nzambi àkubènèshè, mwanèètù. Imàna ànu *mwab'ewu*.

²⁶⁰ Udi uswa kungambila ne, udi mufwànyine kwela cyanza cyèbè muulu kàdi kùyì ne meeji matòòke pa bwalu abu anyi? Cìdì cyenzèkèle bantu ncinyi? Mwanèètù, mbwalu kaayi ebu? Mbwalu kaayi ebu ne bantu bèètù mu ditùkù edi? Udi uswa kwamba ne udi mwà kajuula cyanza cyèbè kuulu, ne uvwa mupiile, kàdi kùyì ulwa anyi? Kàdi manyààyi ne: “Ewu udi mumanye bwà kwenza cìdì cìmpè, kàdi kàyì ucyèna to, mbubì kùdiye.” Kwènà ulwa anyi?

Pàdi mwimbi wa cisanji cyà pyàno, bu wèwè mwà kuswa, mwanèètù wa bakàjì, mwimbi wa cisanji cyà orgue, ànu bwà kamùjiki kakesè cyanàana.

²⁶¹ Ndi nkubiikila. Ndi muswè kukukonka. Mbanganyi mu batèeleji emu bàvwà mu masangisha aa pàvwà . . . Nudi bamanye ne mèmè ncyèna muyiishi to. Ncyèna ne kàlaasà kalonga to.

²⁶² Nzambi àkubènèshè, inàbànza mutekète. Aci ke cìdì cikèngela nsongàakàjì mulelèlè bwà kwenza ncyòci aci. Kòralè mukesè udi ulwa ewu, àkubènèshè, mwanèètù wa bakàjì. Aci's mbukitù bwètù bwà menemene ebu. Ndi—ndi nkàcila inàbànza mutekète awu. Nzambi àkubènèshè, munanga wanyi. Ndi ne mwànà mukesè wa bakàjì kumbèlu, wà bidimu bu byèbè ebi, Rebekah mukesè. Ndi nkwanyisha. Nsongàakàjì mukesè wa cyena Inde? Nzambi àkubènèshè, munanga wanyi, mukalenge mukàjì mutekète ewu. Nzambi ikale neebè, munanga wanyi. Wèwè, mwanèètù wa bakàjì mukesè, Nzambi ikalè neebè. Nènku ne wèwè, mwanèètù wa bakàjì.

²⁶³ Mpindyewu, tàngila kunu. Pìikalàbi ne nwènu bainàbànza batekète mùshindù awu, bansongàakàjì batekète, bapòle mu kondo kàa mwoyi; ne kuyiisha diyiisha dìdì dibàsùnsula tupese tupese, kàdi nyèwù bálù mwaba ewu, bamanye bimpè ne

mbapùile, biimane mwab'ewu kumpàla kwà batèèleji bwà kutonda. Bulelèlà, bulelèlà nwènú bakàji banunu, kanwèna nulwa anyi? Bàndaayi kuneeku, ne nwìmanè lwà apa.

Ndikù mwà kukèba mpàla Webè;
Ondòpaku nyumà wanyi, mutàpìke,
mucibùlùke.

Tùwìmbààyi.

Ùnsùngile ku ngàsà Webè.

Musùngidi, Musùngidi,
Tèèlejà . . .

²⁶⁴ Ncyà bushùwà udi ne meeji matòòke makùmbàne bwà kusambila disambila dyà didipwekesha ne: “Mbìikile, Mukalenge, ntèètèkù, ne ùmòne ne kùdi cintu kampànda cibiipe kùndi.”

Kùmpìcikù to.

Nzambi àkubènèshè, mwanèètù wa bakàji munanga.

²⁶⁵ Mbantu búngì kaayi mu disangisha emu bàdi biimàne kuulu ne bamòne, mu batèèleji, bakàji, balùme, ne bònsò, bàvwa balwe pàmvwà nsambidila babèèdi, ne Nyumà Mwìmpè mubambile bintu, byà mpèkaatù yàbò ne byònsò, ne bamanyè? Mbanganyi bàà kunùdi bàdi bamanyè ne mbulelèlà? Bùtù kabùyì bùpangìla abu. Nyumà Mwìmpè ùdi ùngambila mèmè, yéyè Nyumà Mwìmpè umweumwe awu, bwà ne kùdi cintu kampànda mwaba ewu dilòòlò edi cìdì cìMubungamija. Mpindyewu, aci ng'EMU MMÙDÌ MUKALENGE WÀMBA. Mpindyewu, nùtwilanganè naaci kaaba aka, anyi Mwàmwa.

²⁶⁶ Mèmè ncitu muntu wa masaluka to. To, mukalenge. Ndi mumanyè ànu menemene mwaba wùndì mwimànyìne, ne ndi—ndi mumanyè Nzambi. Ncyà bushùwà. Kùdi bààbúngì bàà kunùdi bàdi bàkèngela bwà kwikalabo biimane ànu mwaba ùdi bansongààkàji batekète aba bàsanganyiibwa ewu. Mpindyewu, kanwena baswè kulwa anyi? Ndi nnubìikila. Ncyà kwenzeja nànsha. Ndi ànu ntwàmabila.

²⁶⁷ Muntu kampànda wàkamba ne: “Kacya ncitukù mwanji kuumvwa dibìikila dyà ku cyoshelu kùdi mwambi mutàndishe batèèleji, mu bintu byà mùshindù awu to.”

²⁶⁸ Ke mùshindù udibi ne cyà kwenjiibwa nànkù. Kwènà ulwa mùshindàmèène pa bwalu-bulonda bwà mwoyi mucibùlùke, bwà maamù kampànda ùpùnga ne lufù anyi cintu kampànda nànsha. Aci, aci ncyà mu disaluka. Dìyi dyà Nzambi ke dyùdi ulwa wimanyinapù. Kwènà ulwa mu disaluka kampànda to. Udi ulwa mwikàle witabuujà ne Nzambi ùdi Nzambi, ne udi usanganyiibwa mu nzùbu wa cilumbulwidi wa Mukalenge. Ne udi ulwa, wakwila bwà bwalu bwèbè.

269 Nzambi àkubènèshè, mwanèètù wa balùme, mwanèètù wa bakàji. Ndi muswè kukulabula ku cyanza, kwamba ne ndi ngàanyisha ditwishibwa dyèbè dyà meeji matòòke. Inàbànzà mutekète, ndi nkwanyisha. Nzambi àkubènèshè. Anyishèku Àkupèeshè Nyumà wa bukitù awu. Àkubènèshè, mwanèètù wa balùme. Nzambi ikalè neebè.

270 Katùpà kakesè kàbidi, pashiishe netùjikijè. Bidi mwà kwenzeka ne bijikè, bwà musangu wà ndekeelu, kàbidi. Nwamònu anyi? Ncyèna mumanye ne ndibà kaayi to. Ndi ntèkemena ne kacyèna mwà kujika to. Kàdi cidi mwà kwenzeka. Nwamònu anyi?

Musùngidi . . .

271 Lwâkù apa, mwanèètù wa bakàji. Ndi muswè nkulabùle ku cyanza, twasàkidila. Ndi ngàanyisha diitabuuja adi. Ki diitabuuja dishùwashùwàlè ndyôdi adi.

272 Lwâkù apa, mwanèètù wa balùme. Ndi muswè kukulabula ku cyanza, apa mene. Ndi ngàanyisha meeji èbè matòòke. Nzambi àkubènèshè.

273 Lwâkù apa. Nzambi àkubànèshè. Ndi ngàanyisha meeji èbè matòòke, bwà kwimanyina . . .

. . . kùmpici to.

Musùngidi . . .

274 Cinyi? “Dibàkà dyà Mwânà wa mùkòòkò ndilwè, ne Mukàj’Èndè musèla mmuDilongòlòle.”

. . . lubilà lupwekèle;

Pavwà . . .

Kùmpicikù to. (Cinyi?)

Ndi mweyèmène ànu mu dikùmbanyina Dyèbè,

Ndiku mwà kukèba mpàla Webè;

Ondòpà nyumà wanyi mutàpìke, mucibùlùke,

(Mwaba ùdi Dìyi ditàpamù.)

Ùnsùngile ku ngàsà Webè.

Musùngidi, Musùngidi,

Tèèleja lwànyì lupwekèle . . .

PaWùdi munkacì mwà kubiikila bakwàbò apu,

Kaa, kùmpicikù to.

275 Vùluka, Nyumà Mwîmpè nguvwa mutàpe mu mwoyi wèbè, ne mukubàndisha apa ewu. Elàayi meeji bwà myaba yidiYe mutàpe, ne muntu awu kàdyàkuyipwaku mwoyi to. Neyikale misangu yònsò ànu ùyivùluka. “Piikalà myoyi yetù kayiyi yitùpìisha to.” Kàdi paùdi ulwa ne cintu kampànda mu Dìyi dyà Nzambi, ne wèwè mucyepùke, aci kí n’Dimiinu dyà Abraham to. Abraham wàkawkàta mulayi wà Nzambi mu mwoyi wèndè, kàyi ùtàngila cìvwà cilwè anyi cìvwà ciyè nànsha.

276 Ndi ngànyisha bônso bàdi biimàne ku cyoshelu eku aba. Disambila dyanyi bwènu wènu, ndyà ne Nzambì wànùpèèshaku dijinga dyà mwoyi wènu dilòòlò edi, ne wànùvwija bantu balelèlè bàà cijila.

277 Bàmwè bàà ku bansongààlùmè aba, ki ba-Indiens mbòbò aba, ba-Espagnoles, beena Mexique, bônso biimàne banyùngùlùke, bantu bàdi bambe ne mbeena Kilistò, pàngäpa, kùkaadi bidimu, kàdi bamòne ne kî mmu byòbì to. Mbaswè kwikala bajaalàme. “Bàà disànka ng’aba bàdi ne nzala ne nyòotà yà bwakàne, bwalu nebùukucishiibwè.” Bapiishiibwe, biikale baswe bwà kucilongolola ne Nzambì, ku byoshelu byà kapyà kàà cilumbulwidi cyà Nzambì.

278 Bàdi ne cyà kutuutakeena naaci mwaba kampànda, balunda bàanyi. Bidi binùkèngela kutuutakeena naaci mwaba kampànda, pa nàнку tuutàkèènaayi naaci mwaba ewu. Kwìndidi too ne pààcyàbu to. Udi mwà kushipiibwa dilòòlò edi, mu njiwù, mu dyalukila dyà kumbèlu.

279 Ànu àbidi àdi panshì aa mu disangisha kampànda, mèmè kwenza dibiikila dyà ku cyoshelu, ne—ne mèmè kubiiikila, cìvwa mbu mu Ohio mwàmwa. Nènku dilòòlò adi, mèmè e kupàtuka mu citanda amu, muyè kùkaavwa tusunsa tutwè ku dikumi ne tùtaanù. Mèmè e kuumvwa muntu kampànda ushìya lubilà, ku luseke lwà njila. Ki mèmè kwimana, kuya kuntwaku. Kàshinyi kàvwa kapetàkane ne njiwù, kakabwele mu kakwàbò. Nènku mukàji kampànda ùvwa musòmbe mwaba awu, ne mijilu mitàndàbàle, kutùlayè kakànù kèndè, ùvwa mubìndùlùke bikolè. Ùvwa mushipiibwe. Kàdi ùvwa uyiikila ne mwanèndè wa bakàji, wènda ùpweka ne njila, wa bwalu wènda wèndesha màshinyi. Bàvwa bàya nèndè kuntwaku, bwà kuya nèndè mu lupitaadi. Kàdi bùbidi bwàbò bàvwa ne cyà kwikala balwè ku cyoshelu. Ki mwànà wa bakàji awu kwambayè ne: “Maamù, mwakù wa ndekeelu wàkangambilàye kumpàlà kwà kàshinyi kukùlukaku ùvwa ne: ‘Ndi mwenzè bibi dilòòlò edi. Ndi mumanyè ne ndi mwenzè bibi.’” Ànu mwaba awu mwoyi wèndè kubiiikidiibwawù.

Kaa, wèwè udi wamba ne: “Aci kacýàkungenzekelakù mèmè to.” Ncifwànyine kwenzeka. Ncifwànyine kwenzeka.

280 Kàdi ambà tũng bu ne Nyumà Mwímpè kî mmukupiishe kàbidì ne mukwambile ne udi mupiile? Dìbà adi neùpatukè mu Cyendèlèlè mùshindù awu. Kàdi nudi bamanyè’s, ne nyumà wa mùshindù awu, kwèna mwà kucyènza to. Mukalenge, tàngìlulà mu lwendu lwebè, ùmòne muwàkendà. Nènku tàngìlulà paanyimà pàpa ne umòne ne nsòmbèlu wa kalolo, wa didipwekesha wa Kilistò udi unwàngana ne Dìyi Dyèndè dyònsò. Byòbì kabiyi nàнку to, nàнку lwàkù ùdilongòlòle. Kùdi...Bwà cinyi—bwà cinyi kwangata mupinganyi, pàdi

maulu mûle tètè ne mabènesha malelèlè à mpenta àkezula mwoyi wèbè, àtòokeshà musùukà wèbè? Kí mmwômò anyi?

²⁸¹ Mbambi bûngi kaayi bàdi munda emu dilòòlò edi? Ndi muswè bàmwè bàà ku nwènù bàná bèètù bwà nùbandè kuneeku neetù. Abi's mbîmpè, mwanètù? Éyowà. Bàndaayi kuneeku, ki mmwômò, ànu katanci kakesè cyanàànà, bàná bèètù? Ncyà bushùwà.

²⁸² Yesù wàkamba, mu Díyi Dyèndè ne: “Ewu udi umvwa Mèyi Àanyi, ne witabuuja Ewu udi muNtùme, ùdi ne Mwoyi wa Cyendèlèlè; kàakupicila mu dipiishibwa to, kàdi mmumanè kuumuka ku lufù muyè ku Mwoyi.” Yone Munsantu 6 mmwambe ne: “Nènku nèmмуjuulè cyàkàbìdi ku ditùkù dyà ndekeelu,” dibìikà dyà ku lufù.

²⁸³ Balùmyànà, twètù, tudi ne cyà kukùngamangana naaci. Tudi ne cyà kucyènzà. Cìdi ànu ne cyà kwenjiibwa. Pa nànkù... Kì ndisaluka nànsha. Disaluka ditu dyènda naaci pàmwè, mu bushùwà bwà bwalu. Ncyà bushùwà. Kàdi bwalu bùdiku mbwà ne, mmwoyi mulàmbula.

²⁸⁴ Angàtà wèwè ànu Díyi dyà Nzambi, wàmbè ne: “Nzambi, ndi mwenzè bibi. Ndi nyingalala bwà dicyènzà. Udi mumanyè mwoyi wànyi. Ndi mwenzè bibi. Ànu mwab'ewu pa cibànzà apa, ndi ntonda bubì bwànyi. Ne kwangacila ku dilòòlò edi, kubangila ku mpindyewu, ngàdilambulu Kùdi. Ndi citùpà cyà Mukàji-musèla. Ncyàdyàkwenza *aci* kàbìdi nànsha; kwitabi bwà ciji cyànyi kubùndukaci kàbìdi. Nèn—Nèngènzè maalu bu inàbànà. Nèngènzè maalu bu muntu mukàlàngà. Nèngènzè bintu bìdi Bible wàmba bwà kwenza. NènKùkwàcìle ànu ku mpindyewu ewu ku Díyi Dyèbè.” Dìbà adi udi ufika mwaba kampànda.

²⁸⁵ Nudi nwitabuuja aci anyi, bayiishi bàà Èvànjeeliyò? Aci mBulelèlè anyi? Ncyà bushùwà.

²⁸⁶ Mpindyewu, twìnyikàayi mitù yètù mu disambila mpindyewu, ànu muntu ne muntu wa kunùdi, mu mùshindù wèbè wèwè wà sungasunga.

²⁸⁷ Vùlukàayi ne, ànu ku luseke lwèbè aku Kilistò ùdikù. Mumpàla mwèbè amu, apa pa cyoshelu apa, mbìmanèpù kùdi beena Kilistò munkaci mwà kusambila. Paanyimà pèèbè; bambi bàà Èvànjeeliyò munkaci mwà kusambila. Mpindyewu, aci cidi cìkutèèka mu cyuyüya cyà disambila.

²⁸⁸ Mpindyewu, ditonda dyèbè, mu myoyi yènù, mu mùshindù wèbè wèwè mwìnè: “Mukalenge, ndi mupiile. Mfwileku luse, Mukalenge, bu mùndi mwenzè bintu ebi. Ndi ntonda mpèkaatù wanyì mpindyewu. Ndi nkwitabuuja Wèwè. Ndi nKwitaba mpindyewu. Ndi muswe kwikala citùpà cyà Mukàji-musèla. Mu Dìná dyà Yesù ndi ndòmba.”

Mpindyewu, lama ditonda dyèbè pa mwoyi wèbè mpindyewu. Mpindyewu nènùsambidilè.

289 Taatù wa mu Dyulu, mùshindù mwinè ùdìbi bimbungamija mîngà misangu pândi ntàngila bantu bàdi bannange, ne mmòna Múdi wangata Dìyi ne Údyàdija patòòke apu. Didi ditàpa too ne mu bwóngò bwà mu mifùbà, kàdi pashiishe Wèwè kulwa ànu mwaba awu bwà kuDishindika ne m'Bulelèlà. M'Bulelèlà.

290 Mbábà biimànè mwaba ewu kùdi balùme ne bakàji, too ne bainábànza batekète, bânà bàà nsongààkàji mbábà biimànè mwaba ewu ne mitù minyika, ne binsónji mu mèsù abò, mu mànsanga à njila wa mwoyi menemene. Ndi ngèèla meeji kùdibo mwà kushiikidila, kwinsì kwàka mu musùmbà ùdi wènda ùdinyonda ne maja, à bìdudadùndà, mukwàciìbwe kùdi dyabùlù, mutàcishiìbwe kùdi dyabùlù. Ki bòbò aba, biimànè kaaba aka dilòòlò edì ne myoyi miinyika, bàjinga cintu kampànda cidìbo mwà kutenteka byanza, bwà kwamba ne: “Mukalenge Nzambì, nkezùlèku ku bintu byà pa buloba.”

291 Bantu bakùlumpè mbòbò aba, nsongàalùmè yà bitende, bakàji banunu, nsongààkàji yà bitende, biimànè bònsò pàmwè. Bàdi munkaci mwà kutonda ne mbapiìlè. Udi mwàkùle ne mwoyi wàbò; cyanààna kabàvwa bafwànyine kwikala apa nànsha. Bidi bìleeja ne kabàvwa mwà kujuuuka nànsha mu nkwasà yàbò nànsha, kakùyì dipàngadika dimana kwangata nànsha. Nyumà wa Nzambì úvwa mubànyùngùlùkile, ne—ne kwambayè ne: “Nudi bapiile.”

Ki mwoyi wàbò mukesè awu kwambawù ne: “Mukalenge, nàнку ndi nKukèba.”

Ki dyabùlù kwambayè ne: “Sòmbaayi bapùwe.”

292 Kàdi Nyumà wa Nzambì mmwambè ne: “Juukilaayi kuulu.” Nènku ki bòbò kubwela mu ditùmikila, ne biimànè ku cyoshelu eku.

293 Mpindyewu, bu mùndì muKutèèlèlè Dìyi Dyèbè ne: “Ewu wâlwa Kùndi, Ncyàkumwipata to nànsha byà kumòna lufù. Nànsha bìkàla mpèkaatù yènu mikùnze kunzùu, neyikalè mitòòke bu nêjè; yòyi mikùnze bu mashi neyitooke bu myòsà yà mùkòòkò. Lwàyi nùsumbè Kùndi, mvinyò ne maanyi. Ngàsà wanyi mmukùmbàne. Ewu udi umvwa Mèyi Àanyi, ne wìtabuuja Ewu udi muNtùme, ùdi ne Mwoyi wà kashidi; ne kààkupìcila ku Cilumbulwidi to, kàdi wàmanyi kuumuka ku lufù muyè ku Mwoyi. Nènku mpindyewu dibàkà dyà Mwànà wa mùkòòkò ndilwe, ne Mukàji—musèla mmumanè kuDilongolola.”

294 Taatù, Mbèbè Wèwè. Bòbò mbitàdi byà bucìmunyi byà ku Dìyi Dyèbè. Bàdi mwaba ewu bwà kwoweshiibwa màyi à Dìyi, bwalu ng'Evànjeeliyò mu kaabujimà. Kèna útwillà ní ncinyi paanyimà nànsha. Mbyupùdìbwe, bwà kupweka ku kàlaasà kàà bânà. Cìdi cijoomona miji, miji yà bululu, mi—mi—miji yà dibènga kucyùka maalu, miji yà maalu à pa buloba. Yijoomone, Mukalenge, ku Nyumà Mwìmpè. Yimanshe kule ne bantu aba.

²⁹⁵ Ndi mbànaana Bwèbè wèwè dilòòlò edi, Yesù, bu bubanji Bwèbè bwà sungasunga, bu mabwe à bilengà à ku cifulu Cyèbè, bu bidimba byà Mukàji Webè musèla. Ndi nnana myoyi yàbò. Ndi ndòmba ne mwoyi wànyì wònsò, pàmwè ne bambi aba, basadidi bàà Nzambì udi ne mwoyi aba. Ndi ndòmba ne Wèwè ùmushè kùdìbo, Mukalenge, maalu à pa buloba, ne ùbàpèèshè bukitù bwà kubànkameena Sàtaanà. Enzaku nàнку, Mukalenge. Tudi twitabuuja ne Wèwè nèucyènzè. Wèwè wàkamba ne: “Lòmbaayi Taatù cintu kanà cyònsò mu Dìna Dyànyì, Mémè nèncyènzè.” Mpindyewu, Kacya Wèwè kùtukù mwambe ne: “Uh, pàmwàpa Nèncyènzè” to. Wèwè wàkamba ne: “Mémè nèncyènzè.” Ne ndi ngiitabuuja ne aci ncilelèlà.

²⁹⁶ Mpindyewu, mbafùnde kàbìdi mu Mifùndu ne: “Mu Dìna Dyànyì nebìpatè badémòns.” Ndyabùlù ùdi mufwànyìne kwangata inàbànzà mutekète anyì mukàji kàmpànda, kunyangakaja nsòmbelu wendè. Ndyabùlù udi mufwànyìne kwangata mulùme kàmpànda ne kunyangakaja nsòmbelu wendè. Nèнку nèndondè kaabwalu kakesè aka, Mukalenge, mu disambila dyànyì. Ne ndi ndòmba ne Wanguumvwakù, ne newàndamunè disambila dyànyì, bwà ne yònsò wa ku aba nùнку neànanyiiwbè dilòòlò edi bu bilengà byà mu Bukalenge. Mbalwè. Ne nendumbululè bwà méyi ànyì dilòòlò edi. Kàdi’s ki bòbò aba balwè bwà kwimana naanyì, ne kutwà ku cyètù ku luseke lwà Kilistò.

²⁹⁷ Mpindyewu, Sàtaanà, wàpangìdi bwalu. Uvwa mulàme ndambù wa kùdìbo paanyimà, kàdi kwèna mucimùne mvità nànsha. Yesù wàkamba ne: “Ewu udi ulwa kùNdi, Ncyàkumwipatakù to nànsha byà munyi.”

²⁹⁸ Sàtaanà, ndi nkwambila, ne dîngà ditùkù kùvwa nsongàalùmè wa citende ùvwa munkaci mwà kudiisha mikòòkò yà tatwèndè. Kàdi nyama wa ntambwe kulwayè e kukwàta ùmwè wà ku yòyì, kudyèla naawù pambèlù, wènda ùwùtacisha, ne ùvwa ùya kawùdyà. Kàdi mulami wa mikòòkò mutekète wa lulamatu ewu, kàvwa ne byàbùngi to ànu ndundu wa nyuunyi, kàdi ùvwa ne diitabuuja mu Nzambì udi ne mwoyi awu. E kudimbatayè nyamà wa ntambwe awu, ne kumubàkulayè, nèнку yèyè—yèyè kumushipa. Wàkàkùngàmangana nèndè, e kumubàkwila ku mwedi wèndè aku e kumushipayè. Kupàtulayè mùkòòkò mukana mwèndè, e kuwàlujayè mu cikùmbi bwà ndyondopiibwa dyàwù.

²⁹⁹ Uvwa mukwàte mikòòkò yà mushinga mukolè yà Nzambì eyi, ba inàbànzà aba, bwà kubàfikisha ku dibebula dyà nsukì yàbò ne kudìlaaba bilaabu, ne kumwèka bu bintu bidì Bible ùpiisha, kàdi wèwè kwela meeji ne uvwa mubàbàkule. Kàdi ki mémè ulwàlwa ne ndundu mupepèle wa nyuunyi wa disambila ewu. Nyèwù mbààluja cyàkàbìdi dilòòlò edi. Wèwè kwèna mwà kushàala mubàmwènéne kàbìdi nànsha. Wàmànyì kucimunyiibwa. Bantu bàà mushinga mukolè aba biimàne

kaaba aka, bânà bàà mikòòkò bàà Nzambi, yilekelele. Tudi tukutùmina díyì, mu Dìna dyà Mukalenge Yesù Kilistò. Ndi ntèeka pankaci pàà biibidilu ebi ne ciiji, ne nsòmbelu yà masandi ne byònsò bìdì mwà kwikalakù abi, ndi ntèeka Mashi à Yesù Kilistò, ku diitabuuja, pankaci pààbì ne cintu aci kàbìdì. Kwàdyàkubàkwàta kàbìdì nànsha. Bàdi mu mpàta wa Taatù. Bòbò mbànà Bèndè. Umùkà kùdìbo. Mu Dìna dyà Yesù Kilistò, ndi nkutùmina díyì.

³⁰⁰ Kakwènakù dyabùlù mu iferno udi mwà kukulenga to, bu wèwè mwà kwitabuuja aci. Udi mubwikila kùdì Mashi. Wèwè udi munyungulukila kùdì disambila, bambi bàà Èvànjeeliyò, ne baamisànjeela bàà cipungidi, disambila. Yònsò wa kunùdì nwènú bàdi biimàne mwab'ewu aba, bàndaayi kuneeku, bamanyè ne nuwua ne biibidilu, bilema, ne bintu binùvwà nudyùmvwa bundù. Nwènú babitèeke mpindyewu pa cyoshelu cyà Nzambi cìdì citeema kapyà cyà cilumbulwidi, ne baciitabe mpindyewu bu difwidiibwa dyènú dyà luse, ne Kilistò ùdì ùnùpadi, nudi mwà kwenza dilòmba adi ku diitabuuja anyi, pa kwela byanza byènú muulu kwamba ne: “Ndi mpindyewu ncìitaba. Mbiyè. Ne kubangila ku ditùkù edi, ncyàdyàkucyènzakù kàbìdì to”? Udi musùngìdiibwe ku Mashi à Yesù Kilistò. Amen. Amen. Butùmbì kùdì Nzambi.

Kùdikù mungà muntu udi muswè kulwa, bwà kulamakana ku musùmbà ewu anyi?

³⁰¹ Kùdikù mubèèdi mu citanda emu, udi muswè kwimana bwà disambila ànu mpindyewu ewu pa díbà edi anyi? Imàna kuulu.

³⁰² Ndi muswè bwà umwe ne umwe wa kunùdì mwaba ewu, pawikala kùyì cì—pawikala kùyì cidimba cyà èkèleeziyà kampànda mwimpè wà Èvànjeeliyò mu kaabujimà to, ndàaku kùdì umwe, ku ewu ní udi mwà kuya, pawikalà musòmbèle pabwìpì apa. Petàngàna ne mpaasàta ne ùbàtijiibwe. Ne pashiishe pawikalà kùyì mupetè Nyumà Mwimpè to, sambila bwà Nzambi àkupèèshè Nyumà Mwimpè ne àkùje, àkuvwijè cidimba cyà Mukàjì-musèla.

³⁰³ Tàngilàayi pambèlu pààpa, bânà bèètù, kùdì babèèdi kwàka. Dyabùlù kèna mwà kushààla mukwàta bantu abu to. Eci ncikondo cyà kusùludiibwa. Àlèluuyàh! Kanwèna nwitabuuja aci anyi?

Twìnyikààyaaku díbà adi mitù yètù bwà disambila.


³⁰⁴ Ne yònsò wa kunùdì nwènú bàdi pambèlu pààpa, bàdi ne bubèèdi, nwènú bàdi biimàne kuulu abu, tentèkèlàngànaayi byanza muntu ne mukwèndè. Yesù Kilistò wàkamba ne: “Bimanyinu ebi nebifilè aba bàdi biitabuuja. Bòbò batentèkéle babèèdi byanza, nebàsàngalè.” Shààlaayi batentèkèlàngàne byanza muntu ne mukwèndè. Mpindyewu, kùdisambìdìdì wèwè nkààyebè to. Udi usambidila mutumba neebè ùdì mutentèkéle byanza awu, bwalu ùdì ùkusambidila.

Tùsambilàayi pàmwè mpindyewu bu Èkèleeziyà wa beena Kilistò.

³⁰⁵ Mukalenge Yesù, tudi ne kusàkidila bwà bucìmunyi dilòlò edi, misùukà yilwa kùdi Wèwè. Mpindyewu, dyabùlù mmubàkule yimwè yà ku mikòòkò Yèbè, ne mabèèdi. Nyèwù tulwa kuyinana. Ne bu Èkèleeziyà wa Nzambi udi ne mwoyi, tudi tutàndisha dyabùlù, twamba ne: “Lekèlèlà bantu bàdi basaama aba, Sàtaanà. Tudi tukutumina díyi mu Dîná dyà Yesù Kilistò, bwà bóbò kwondopiibwa.” Bible mmwambè ne: “Bimanyinu ebi nebìfilè aba bàdi bìitabuujà. Bóbò batentèkèle babèèdi byanza, babèèdi nebàsangale.” Ki mulayi wa Nzambi ngwòwò awu, ne tudi bamanye ne mmulelèlà. Mbondòpiibwè ku mibùndàbùndà yà Mukalenge Yesù Kilistò.

³⁰⁶ Mpindyewu, wèwè mucitàbùùje, elà byanza muulu ùMupèèshe butùmbi. Amen.

³⁰⁷ Èyo, mpaasàtà, byònsò mbyèbè wèwè. Nzambi àkubènèshè, mwanèètù. Bilenga be bwà kwikala neenù dilòlò edi. Nzambi ìkalè neebè.

Nzambi ànubènèshè, bânà bèètù bàdi kaaba aka. 

62-0121E Dibàkà Dya Mwàna Wa Mùkòòkò
Fellowship Tabernacle
Phoenix, Arizona États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyì dya bwena-cintu

Makenji ònsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bingà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org